

清

史

稿

清史稿

本紀六

聖祖本紀一

聖祖合天弘運文武睿哲恭儉寬裕孝敬誠信功德大成仁皇帝諱玄燁世祖第三子也母孝康章皇后佟佳氏順治十一年三月戊申誕上於景仁宮天表英俊岳立聲洪六齡偕兄弟問安世祖問所欲皇二子福全言願爲賢王帝言願效法父皇世祖異焉順治十八年正月丙辰世祖崩帝即位年八歲改元康熙遺詔索尼蘇克薩哈退必隆熬拜四大臣輔政二月癸未上釋服乙未誅有罪內監吳良輔罷內官丙申以嗣簡親王濟度子德塞襲爵三月丙寅詔曰國家法度代有不同太祖太宗創制定法垂裕後昆今或滿漢參差或前後更易其詳考成憲勅爲典章集議以聞四月予殉葬侍衛傅達理祭葬甲申命湖廣總督駐荊州乙酉命將軍綽圖安統定南部軍鎮廣西丙戌以拉哈達爲工部尙書癸卯安南國王黎維祺遣使入貢丙午大學士洪承疇乞休允之予三等輕車都尉世職戊申賜馬世倭等三百八十三人進士及第出身有差五月罷

各省巡按官己巳以高景爲工部尙書劉良佐爲江安提督乙亥安南叛臣莫敬耀來歸封歸化將軍六月己卯江蘇巡撫朱國治疏言蘇省通賦紳衿一萬三千五百十七人下部斥黜有差辛巳黑龍江飛牙喀部十屯來歸庚寅以嗣信郡王鐸尼子鄂扎襲爵癸巳大學士傅以漸乞休允之丁酉罷內閣復內三院戊戌吳三桂進馴象五却之詔停直省進獻閏七月庚辰以車克爲吏部尙書阿思哈爲戶部尙書甲午以傅維麟爲工部尙書壬寅予蘇松提督梁化鳳男爵八月甲寅達賴喇嘛請通市許之九月丁未以下三元爲雲南總督李棲鳳爲廣東總督鄭廷佐爲江南總督梁化鳳爲江南提督十月己酉以林起龍爲漕運總督誅降將鄭芝龍及其子世恩世廕辛酉裁順天巡撫山東民于七作亂逮問巡撫許文秀總兵李永盛范承宗命靖東將軍濟世哈討平之十一月丙子朔上親祀天於園丘己亥世祖章皇帝升祔太廟甲辰湖南巡按御史仵劬昕坐贓棄市十二月丙午平西王吳三桂定西將軍愛星阿會報大軍入緬緬人執明永歷帝朱由榔以獻明將白文選降班師丁卯宗人府進玉牒是

歲免直隸江南河南浙江湖廣陝西各州縣被災額賦有差朝鮮遣使進香入貢

康熙元年壬寅春正月乙亥朔乙酉享太廟庚寅錄大學士范文程等佐命功官其子承謨等俱內院學士二月壬子太皇太后萬壽節上率羣臣朝賀三月以滇南平告廟祭陵赦天下辛卯萬壽節己亥遣官安輯浙江福建廣東新附官民夏四月丙辰上太祖太宗尊諡五月戊寅夏至上親祭地於方澤六月丁未命禮部考定貴賤等威秋七月壬申朔以車克爲大學士甯古禮爲戶部尙書張杰爲浙江提督施琅爲福建提督八月辛丑朔大學士金之俊罷九月裁延綏巡撫冬十月壬寅以成克鞏爲大學士癸卯尊皇太后爲太皇太后尊皇后爲仁憲皇太后母后爲慈和皇太后十一月辛巳冬至祀天於圜丘免朝賀十二月辛酉命吳三桂總管雲南貴州兩省是歲天下戶丁一千九百一十三萬七千六百五十二徵銀二千五百七十二萬四千一百二十四兩零鹽課銀二百七十二萬一千二百一十二兩零鑄錢二萬九千萬有奇免直隸江南各

州縣災賦有差朝鮮入貢

二年癸卯春正月己亥廣東總督盧崇峻請封民船濟師斥之二月庚戌慈和皇太后佟佳氏崩三月荷蘭國遣使入貢請助師討臺灣優資之五月丙子以孫廷銓爲大學士乙酉雲南開局鑄錢丙戌詔天下錢糧統歸戶部部寺應用俱向戶部關領著爲令戊子以魏裔介爲吏部尙書甲午恭上大行慈和皇太后尊諡曰孝康慈和莊懿恭惠崇天育聖皇后六月葬世祖章皇帝於孝陵孝康皇后端敬皇后祔焉戊申以龔鼎孳爲左都御史乙卯故明將李定國子嗣興來降乙丑以哈爾庫爲浙江提督八月癸卯詔鄉會試停制義改用策論復八旗繙譯鄉試甲寅命穆里瑪爲靖西將軍圖海爲定西將軍率禁旅會四川湖廣陝西總督討鄖陽通賊李來亨郝搖旗等冬十月壬寅耿繼茂施琅會荷蘭師船剿海寇克廈門取浯嶼金門二島鄭錦遁於臺灣十一月詔免諸國貢使土物稅乙酉冬至祀天於圓丘十二月壬戌祫祭太廟是歲免直隸江南江西河南陝西浙江湖廣四川雲南貴州等省二百七十餘州縣災賦朝鮮入貢

進香

三年甲辰春正月賜朝正外藩銀幣鞍馬二月壬寅巡鹽御史張吉午請增長  
蘆鹽引斥之三月丙子耿繼茂等拔銅山丙戌賜嚴我斯等一百九十九人進  
士及第出身有差夏四月己亥輔臣等誣奏內大臣飛揚古子侍衛倭赫擅騎  
御馬飛揚古怨望并棄市籍其家熬拜以予其弟穆里瑪遣尙書喀蘭圖赴科  
爾沁四十七旗泣盟戊申裁鄖陽撫治五月甲子詔州縣私派累民上官容隱  
者併罪之六月庚申詔免順治十五年以前逋賦閏六月乙酉以王弘祚爲刑  
部尙書丙戌以漢軍京官歸入漢缺升轉秋七月丁未以施琅爲靖海將軍征  
臺灣八月甲戌浙江總督趙廷臣疏報擒獲明臣張煌言己卯穆里瑪圖海疏  
報進剿鄖陽茅麓山李來亨郝搖旗俱自焚賊平九月癸丑發倉粟賑給八旗  
莊田乙卯以查克旦爲領侍衛內大臣十一月壬辰冬至祀天於圓丘丁未以  
魏裔介爲大學士杜立德爲吏部尙書王弘祚爲戶部尙書魏鼎華爲刑部尙  
書十二月戊午朔日有食之丙戌給祭太廟是月彗星見張宿井宿胃宿奎宿

金星見給事中楊雍建請修省是歲免直隸江南江西山東陝西浙江福建湖廣貴州等省一百二十一州縣被災額賦有差朝鮮入貢

四年乙巳春正月壬辰以郝惟訥爲左都御史己亥停樵關溢額獎敘辛丑封承澤親王碩色子博翁果諾爲惠郡王致仕大學士洪承疇卒予祭葬設文襲二月乙丑太皇太后聖壽免朝賀己巳吳三桂疏報勦平水西烏撒土司擒其酋安坤安書聖丙戌以星變詔臣工上言闕失御史董文驥疏言大臣更易先皇帝制度非是宜一切復舊三月戊子京師地震有聲辛卯金星晝見以星變地震肆赦免逋賦山西早有司不以聞下吏部議罪免其積逋及本年額賦壬辰詔禁州縣預徵隔年稅糧丙申詔曰郡縣災荒有司奏請蠲賦而小民先期已完是澤不下逮也自今被災者預緩徵額賦十之三甲辰萬壽節免朝賀丙午修厯代帝王廟太常寺少卿錢經請簡老成耆德博通經史者數人出入侍從以備顧問夏四月丙寅詔凡災傷免賦者並免丁徭戊辰詔卿貳督撫員缺仍廷推五月丁未置直隸總督兼轄山東河南裁貴州總督歸雲南廣西總督

歸廣東江西總督歸江南山西總督歸陝西鳳陽甯夏南嶺巡撫悉裁之六月  
乙丑詔父子兄弟同役給復一年秋七月己酉吏部以山西徵糧如額請議敘  
詔曰義以太原諸處旱災饑饉督撫不以聞議罪會赦得原豈可仍以催科報  
最惟未被災之地方官仍予紀錄八月庚午詔賊官遇赦免罪者不許復職九  
月辛卯冊赫舍里氏爲皇后輔臣索尼之孫女也上太皇太后皇太后尊號加  
恩中外冬十月癸亥上幸南苑校射行圍甲戌還宮十一月丁酉祀天於圜丘  
十二月庚辰祭太廟是歲免直隸江南江西山東河南浙江湖廣貴州等省  
一百二十一州縣衛災賦有差朝鮮琉球暹羅入貢索倫飛牙喀人來歸

五年丙午春正月庚寅以廣東旱發倉穀七萬石賑之以承澤親王碩色子恩  
克布圖爵二月壬子朔置平遠大定黔西三府丁巳以十二月中氣不應詔求  
明歷法者乙丑詔自今漢軍官丁憂准解任持三年喪三月以胡拜爲直隸總  
督五月丙午以孫延齡爲廣西將軍接統定南部軍駐桂林六月庚戌朔日有  
食之癸酉傅維麟病免以郝惟訥爲工部尙書辛未詔崇文門凡貨物出京者



弛其稅秋七月庚辰朔以朱之弼爲左都御史辛巳疏球來貢並補進漂失前貢上嘉其恭順命還之自今非其國產勿以貢八月己酉給事中張維赤疏請親政九月丁亥上行圍南苑癸卯還宮禮部尙書沙澄免以梁清標爲禮部尙書張鼎華爲兵部尙書郝惟訥爲刑部尙書朱之弼爲工部尙書冬十月詔起范承謨爲秘書院學士十一月丙申輔臣鰲拜以改撥圍地誣奏大學士管戶部尙書蘇納海直隸總督朱昌祚巡撫王登聯等罪逮下獄四大臣之輔政也皆以勳舊索尼年老遇必隆闇弱蘇哈薩克望淺心非鰲拜所爲而不能爭鰲拜橫暴又宿將多戰功敘名在末而遇事專橫屢興大獄雖同列亦側目焉十二月丙寅鰲拜矯旨殺蘇納海朱昌祚王登聯甲戌始祭太廟是歲免直隸江南江西河南陝西浙江湖廣等省八十六州縣災賦有差朝鮮琉球入貢

六年丁未春正月己丑封世祖第二子福全爲裕親王丁酉上幸南苑行圍以明安達禮爲禮部尙書二月癸亥晉封故親王尼堪子貝勒蘭布爲郡王丁卯以宗室公班布爾善爲大學士起圖海復爲大學士錫故總督李率泰一等男

爵三月己亥賜繆彤等一百五十人進士及第出身有差夏四月甲戌加索尼一等公甲子江南民人沈天甫撰逆詩誣告人誅之誣者皆不論御史田六善言奸民告訐於南人不曰通海則曰逆書北人不曰于七黨則曰逃人請鞠誣反坐從之五月辛酉吳三桂疏辭總理雲南貴州兩省事從之六月己亥禁採辦楠木官役生事累民秋七月己酉上親政御太和殿受賀加恩中外罪非殊死咸赦除之是日始御乾清門聽政甲寅命武職官一體引見己未輔臣鰲拜擅殺輔臣蘇克薩哈及其子姓癸亥賜輔臣遏必隆鰲拜加一等公九月丙午命修世祖實錄冬十月己卯盛京地震有聲十一月丁未冬至祀天於圓丘奉世祖章皇帝配饗丁巳加上太皇太后皇太后徽號十二月丙戌以塞白理爲廣東水師提督戊子以馬爾賽爲戶部增設尙書戊戌給祭太廟是歲免直隸江南江西山東山西陝西甘肅浙江福建湖廣等省一百六十州縣災賦有差朝鮮荷蘭入貢

七年戊申春正月戊申以莫洛爲山西陝西總督劉兆麒爲四川總督戊午加

熬拜遇必隆太師二月辛卯上幸南苑三月丁未詔部院官才能卓越升轉毋  
拘常調夏四月庚辰浙江嘉善民郁之章有罪遣戍其子褒廣叩關請代上並  
宥之五月壬子以星變地震下詔修省諭戒臣工六月癸酉金星晝見丁亥平  
南王尙可喜遣子之信入侍秋七月戊午前漕運總督吳維華請徵市鎮間架  
錢洲田招民出錢佃種上惡其言利下刑部議罪庚申以夸岱爲滿洲都統秋  
八月壬申戶部尙書王宏祚坐失察書吏僞印盜帑免九月庚子以吳瑪護爲  
奉天將軍額楚爲江寧將軍瓦爾喀爲西安將軍壬寅上將巡邊侍讀學士熊  
賜履給事中趙之符疏諫上爲止行仍令遇事直陳冬十月定八旗武職人員  
居喪百日釋編任事仍持服三年庚午上幸南苑十一月癸丑冬至祀天於圜  
丘十二月癸酉以麻勒吉爲江南總督甘文焄爲雲南貴州總督范承謨爲浙  
江巡撫癸巳禘祭太廟是歲免奉天直隸江南山東河南浙江陝西甘肅等省  
二百十六州縣災賦有差朝鮮安南暹羅入貢

八年己酉春正月戊申修乾清宮上移御武英殿二月庚午命行南懷仁推算

歷法庚午上巡近畿三月辛丑以直隸廢藩田地予民夏四月癸酉衛周祚免以杜立德爲大學士丁丑上幸太學釋奠先師孔子講周易尙書丁巳給事中劉如漢請舉行經筵上嘉納之五月乙未以黃機爲吏部尙書郝惟訥爲戶部尙書龔鼎孳爲禮部尙書起王宏祚爲兵部尙書戊申詔速輔臣鰲拜交廷鞫上久悉鰲拜專橫亂政特慮其多力難制乃選侍衛拜唐阿年少有力者爲撲擊之戲是日鰲拜入見即令侍衛等掊而繫之於是有善撲營之制以近臣領之庚申王大臣議鰲拜獄上列陳大罪三十請族誅詔曰鰲拜愚悖無知誠合夷族特念效力年久迭立戰功貸其死籍沒拘禁其弟瑪里穆塞本得從子訥莫其黨大學士班布爾善尙書阿思哈噶褚哈濟世侍郎泰璧圖學士吳格塞皆誅死餘坐譴黜其弟巴哈宿衛淳謹卓布泰有軍功免從坐嗣敬謹親王蘭布降鎮國公禩遏必隆太師一等公六月丁卯詔曰朕夙夜求治念切民依邇年水旱頻仍盜賊未息兼以貪吏朘削民力益殫朕甚閔焉部院科道諸臣其以民間疾苦作何裨益各抒所見以聞戊辰敕改造觀象臺儀器壬申詔復輔

臣蘇克薩哈官及世職其從子白爾圖立功邊徼被枉尤酷復其世職均令其子承襲戊寅詔滿兵有規占民間房地者永行禁止仍還諸民以米思翰爲戶部尙書戊子詔宗人有罪遽絕屬籍心有不忍自順治十八年以來宗人創籍者宗人府詳察以聞秋七月壬辰朔裁直隸山東河南總督壬寅詔復大學士蘇納海總督朱昌祚巡撫王登聯原官並予諡八月甲申以索額圖爲大學士明珠爲左都御史九月甲午京師地震有聲丁未以勒貝爲滿洲都統塞白理爲浙江提督畢力克圖爲蒙古都統冬十月甲子上幸南苑詔行在勿得借用民物庶溝橋成上爲文勒之石十一月己亥先是山西陝西總督莫洛陝西巡撫白清額均坐繁拜黨罷至是西安百姓叩閭稱其清廉乞還任詔特許之壬子太和殿乾清宮成上御太和殿受賀入居乾清宮十二月己卯顯親王福壽薨丁亥哈祭太廟是歲免直隸江南河南山西陝西湖廣等省四十五州縣災賦有差朝鮮琉球入貢

九年庚戌春正月內申予宋儒程顥程頤後裔五經博士丁酉饗太廟辛丑祈

穀於上帝奉太祖高皇帝太宗文皇帝世祖章皇帝配饗起過必隆公爵宿衛  
內廷己酉詔明藩田賦視民田輸納壬子上幸南苑二月癸酉以金光祖爲廣  
東廣西總督馬雄鎮爲廣西巡撫癸未詔尙陽堡甯古塔流徙人犯值十月至  
正月俱停發三月辛酉賜蔡啟儔等二百九十二人進士及第出身有差夏四  
月己丑以蔡毓榮爲四川湖廣總督己亥上幸南苑五月丙辰朔加上孝康章  
皇后尊諡升祔太廟頒發恩詔訪隱逸賜高年赦殊死以下丙子纂修會典六  
月丙戌朔以席卜臣爲蒙古都統丁酉以故顯親王福壽子丹臻襲爵己酉命  
大學士會刑部錄囚秋七月丁巳以王輔臣爲陝西提督丁巳奉祀孝康章皇  
后於奉先殿八月戊子祭社稷壇詔都察院糾察陪祀王大臣班行不肅者乙  
未復內閣復翰林院丁酉上奉太皇太后皇太后有事於孝陵壬子車駕還宮  
九月庚申以簡親王濟度子喇布襲爵冬十月庚巳頒聖諭十六條甲午改內  
三院復中和殿保和殿文華殿大學士丁酉諭禮部舉經筵十一月癸酉以艾  
元徵爲左都御史壬午以中和殿大學士魏裔介兼禮部尙書十二月癸卯以

莫洛爲刑部尙書辛亥祫祭太廟是歲免河南湖廣江南福建廣東雲南等省二百五十三州縣衛災賦有差朝鮮入貢

十年辛亥春正月丁卯蒙古蘇尼特部四子部大雪饑寒遣官賑之癸酉封世祖第五子常甯爲恭親王庚辰大學士魏裔介罷以曹申吉爲貴州巡撫二月丁酉以馮溥爲大學士以梁清標爲刑部尙書乙巳召宗人覺羅年七十以上趙班等四人入見賜朝服銀幣戊申命編纂孝經衍義庚戌以尼雅翰爲滿洲都統三月壬子朔誥誠年幼諸王讀書習騎射勿恃貴縱恣癸丑置日講官庚午以無雨風霾下詔修省夏四月乙酉命纂修太祖太宗聖訓詔宗人閒散及幼孤者量予養贍著爲令丙戌詔清理庶獄減矜疑一等辛卯始開日講壬辰上詣天壇禱雨甲午雨五月庚申理藩院尙書喀蘭圖乞休加太子太保以內大臣奉朝請癸酉上幸南苑六月丁亥以靳輔爲安徽巡撫甲午金星晝見是月靖南王耿繼茂卒子精忠襲封仍鎮福建八月己卯朔日有食之丁未上御經筵戊申以王之鼎爲江南提督九月庚戌上以賓字一統告成於二陵辛亥

上奉太皇太后皇太后啟鑒蒙古科爾沁喀喇沁土默特敖漢諸部王貝勒公朝行在丁卯謁福陵昭陵戊辰祭福陵行告成禮庚午祭昭陵行告成禮辛未上幸盛京御清甯宮賜百官宴八十以上召前賜酒大賚奉天甯古塔甲士及於傷廢老病者白金民間高年亦如之曲赦死罪減一等軍流以下釋之山海關外蹕路所經勿出今年明年租賦遣官祭諸王諸大臣墓壬申上自盛京東巡冬十月辛巳駐蹕愛新召甯古塔將軍巴海諭以新附瓦爾喀虎爾哈宜善撫之己丑上迴蹕盛京再賜老人金辛卯謁福陵昭陵命文武官較射命來朝外藩較射壬辰上奉太皇太后皇太后迴鑾十一月庚戌還京壬申以明珠爲兵部尙書十二月丙午禋祭太廟是歲免直隸江南江西浙江山東河南陝西湖廣等省三百二州縣衛災賦逋賦有差朝鮮琉球入貢

十一年壬子春正月辛未上奉太皇太后幸赤城湯泉過八達嶺親扶慈輦步行下山二月戊寅奉太皇太后至湯泉辛卯上迴京丙申親耕藉田丁酉朝日於東郊戊戌上詣赤城三月戊辰上奉太皇太后還宮夏四月乙巳命侍衛吳



丹學士郭廷祚巡視河工五月乙丑世祖實錄成丙寅上出德勝門觀麥六月  
庚寅命更定賦役全書秋七月己酉論征緬甸雲南貴州功予何建忠等一百  
二十七人世職丙辰上觀禾御史孟雄飛疏言孫可望窮蹙來歸濫膺王封及  
伊身死已襲二次今孫徵淳死宜令降襲詔降襲慕義公閏七月復封尙善爲  
貝勒丁亥詔治獄勿用嚴刑輕斃人命違者罪之八月壬子上幸南苑行圍癸  
丑詔曰帝王致治在維持風化辨別等威比來官員服用奢僭競相效尤其議  
禁之庚申上御經筵壬戌上奉太皇太后幸遵化湯泉甲子閱薊州官兵較射  
丁卯上謁孝陵九月丁丑閱遵化兵三屯營兵冬十月甲辰上奉太皇太后還  
宮壬子命范承謨爲福建總督十一月辛丑上幸南苑建行宮十二月丁未裕  
親王福全莊親王博果鐸惠郡王博翁果諾溫郡王孟峨疏辭議政允之戊午  
上召講官諭曰有人請令言官風聞言事朕思切中事理之言患其不多若借  
端生事傾陷擾亂深足害政與民休息道在不擾虛耗元氣則民生蹙矣己未  
康熙王傑書安親王岳樂疏辭議政不許庚午哈祭太廟是歲免直隸江南浙

江山東山西河南湖廣等省一百四十一州縣衛災賦有差朝鮮入貢

十二年癸丑春正月庚寅上幸南苑大閱二月辛亥以吳正治爲左都御史壬子上御經筵命講官日直戊辰賜八旗官學繙譯大學衍義三月丁丑上視麥壬午平南王尙可喜請老許之請以其子之信嗣封鎮粵不許令其撤藩還駐遼東癸巳賜韓莢等一百六十六人進士及第出身有差夏四月丁巳遣官封暹羅國王五月壬申學士傅達禮等請以夏至輟講上曰學問之道宜無間斷其勿輟六月壬寅起張朝珍爲湖廣巡撫李之芳爲浙江總督丁未上御瀛臺召羣臣觀荷賜宴乙卯禁八旗以奴僕殉葬秋七月庚午平西王吳三桂疏請撤藩許之內子嗣靖南王耿精忠疏請撤藩許之壬午命重修太宗實錄八月丁未試漢科道官於保和殿不稱職者罷壬子遣侍郎折爾肯學士傅達禮往雲南尙書梁清標往廣東侍郎陳一炳往福建經理撤藩丁巳諭禮部祭祀大典必儀文詳備乃可昭格其稽古典禮酌議以聞九月戊辰禮部尙書龔鼎孳乞休允之乙亥京師地震詔修省冬十月壬寅以王之鼎爲京口將軍己酉上

幸南苑行圍十一月丁卯故明宗室朱議深以蓄髮論死得旨免死入旗給與妻室房地庚午詔民間墾荒田畝以十年起科十二月壬子以姚文然爲左都御史吳三桂反殺雲南巡撫朱國治貴州提督李本深巡撫曹申吉俱降賊總督甘文焜死之內辰反問至命前鋒統領碩岱率禁旅守荊州丁巳召梁清標陳一炳還停撤二藩命加孫延齡撫蠻將軍線國安爲都統鎮廣西命西安將軍瓦爾喀進守四川京師民楊起隆僞稱朱三太子圖起事事發覺起隆逸去捕誅其黨詔奸民作亂已平勿株連民勿驚避己未命順承郡王勒爾錦爲甯南靖寇大將軍討吳三桂執三桂子額駙吳應熊下之獄庚申命副都統馬哈達帥師駐兖州擴爾坤駐太原備調遣辛酉命直省巡撫仍管軍務壬戌詔削吳三桂爵宣示中外命都統赫業爲安西將軍會瓦爾喀守漢中以倭內爲奉天將軍吳三桂陷辰州甲子禘祭太廟是歲免直隸山東安徽浙江湖廣等省二十六州縣衛災賦有差朝鮮安南入貢

十三年甲寅春正月乙亥勒爾錦師行庚辰吳三桂陷沅州丁亥偏沅巡撫盧

震棄長沙遁己丑以提督修國瑤守鄖陽總兵吳之茂以四川叛巡撫羅森提督鄭蛟麟降之命總兵徐治都還守夷陵庚寅封世祖第七子隆禧爲純親王以席卜臣爲鎮西將軍守西安二月乙未朔太皇太后頒內帑犒軍丁酉欽天監新造儀象成壬寅賊犯澧州守卒以城叛提督桑峨退荊州陷常德命鎮南將軍尼雅翰率師守武昌癸丑上御經筵以趙賴爲貴州提督甲寅吳三桂陷長沙副將黃正卿叛應之旁陷衡州命都統覺羅朱滿守岳州未至岳州失辛酉命刑部尙書莫洛加大學士銜經略陝西孫延齡以廣西叛殺都統王永年執巡撫馬雄鎮幽之三月乙丑命整飭驛站每四百里置一筆帖式接遞軍報探發塘報命左都御史多諾等軍前督餉戊辰吳三桂將犯夷陵勒爾錦遣兵擊敗之庚午以額駙華善爲安南將軍鎮京口庚辰耿精忠反執福建總督范承謨幽之巡撫劉秉政降賊癸未鄖陽副將洪福叛提督修國瑤擊敗之壬辰襄陽總兵楊來嘉以穀城叛命希爾根爲定南將軍尙書哈爾哈齊副之命舒恕桑遏根特席布率師赴江西甲午西安將軍瓦爾喀克陽平關夏四月癸卯

調西安副都統德業立守襄陽丁未吳三桂子應熊孫世霖伏誅初三桂倉卒起兵而名義不揚中悔至澧州頗前却至是方食聞報驚曰上少年乃能是耶事決矣推食而起詔削孫延齡職以阿密達爲揚威將軍駐江南賴塔爲平南將軍赴杭州甲寅湖州總兵劉進忠以城叛戊午以根特爲平寇將軍赴廣西討孫延齡河北總兵蔡祿謀叛命阿密達襲誅之辛酉詔削耿精忠爵癸亥詔以分調禁旅遣將分防情形寄示平西王尙可喜五月丙寅皇子胤礽生皇后赫舍里氏崩戊寅安西將軍赫業等敗吳之茂於劄闊堡復朝天關壬午浙江平陽兵變執總兵蔡朝佐應耿精忠將曾養性圍瑞安命賴塔進兵討之壬辰副都統德業立敗洪福於武當六月丙午命貝勒尙善爲安遠靖寇大將軍率師赴岳州貝子準達赴荊州庚戌總兵祖宏勳以溫州叛金華副將軍牟大寅敗耿精忠將於常山壬子命將軍喇哈達守杭州乙卯命康親王傑書爲奉命大將軍赴浙江貝勒洞鄂爲定西大將軍赴四川浙江溫州黃岩太平諸營相繼叛命喇哈達守台辛未以郎廷佐爲福建總督段應舉爲提督癸酉賴

塔敗耿精忠將於金華是時精忠遣其大將馬九玉曾養性犯浙江白巖忠犯江西所至土匪響應江西尤甚南瑞總兵楊富應賊董衛國誅之丁亥貝勒察尼大戰賊將吳應麒於岳州七里山敗之八月壬寅平寇將軍根特卒於軍以哈爾哈齊代之海澄公黃梧卒子芳度襲爵守漳州乙巳金光祖報孫延齡陷梧州督兵復之丙午上幸南苑九月壬戌上御經筵命每日進講如常耿精忠將以土寇陷清谿徽州江甯將軍額楚統領巴爾堪擊走之連戰入江西復樂平等縣命碩塔等駐安慶辛未麻城土寇鄒君升等作亂知府于成龍討平之命簡親王喇布爲揚威大將軍率師赴江西侍衛坤爲振武將軍副之廣西提督馬雄叛命安親王岳樂爲定遠平寇大將軍率師赴廣東宗室瓦山覺羅畫特副之冬十月壬辰喇布師行丙申岳樂師行壬寅上奉太皇太后幸南苑辛亥還宮十一月庚申朔莫洛報吳之茂兵入朝天關饒路中阻洞鄂退守西安命移西安軍守漢中河南軍守西安十二月庚寅朔傑書大敗曾養性於衢州又敗之於台州王輔臣叛經略莫洛死之上議親征王大臣以京師根本重地

太皇太后年高力諫乃止徵盛京兵蒙古兵分詣軍前丁未命尙可喜節制廣東軍事戊午給祭太廟是歲免直隸江南山東河南陝西等省七十八州縣災賦有差朝鮮琉球入貢

十四年乙卯春正月辛酉尙可喜報賊犯連州官兵擊敗之戊辰管封尙可喜平南親王命其子之孝佩大將軍印討賊二月癸巳下詔切責貝勒洞鄂退縮失機飭令速定平涼秦州以通棧道乙巳康親王傑書遣兵復處州進復仙居王輔臣陷蘭州西甯總兵王進寶大戰於新城圍蘭州洞鄂復隴州關山關三月己未朔叛將楊來嘉犯南漳總兵劉成龍擊走之戊辰饒州賊犯祁門巡檢張行健被執不屈死之丁丑命張勇爲靖逆將軍會總兵孫思克等討王輔臣賊陷定邊城命提督陳福駐甯夏討賊丁亥蒙古布爾尼反命信郡王鄂扎爲撫遠大將軍大學士圖海爲副將軍討平之戊子以熊賜履爲大學士夏四月己丑以勒德洪爲戶部尙書署護軍統領郎肅等勦耿寇於五桂寨斬級二萬復餘干乙未封張勇靖逆侯王進寶一等男戊戌以左都督許貞鎮撫州建昌

廣信戊申王輔臣遣兵援秦州官兵迎擊敗之辛亥上諭侍臣進講朕仍覆講  
互相討論庶有發明癸丑王進寶復臨洮孫思克復靖遠戊午紹興知府許宏  
勳招撫降衆五萬人五月庚午察哈爾左翼四旗來歸庚辰命畢力克圖援榆  
林王輔臣兵陷延安綏德甲申張勇復洮河二州閏五月癸巳上幸玉泉山觀  
禾楊來嘉洪福陷穀城斬守城不力之副將馬郎阿以徇創總兵金世需職隨  
軍效力壬子額楚復廣信樂平土寇復陷饒州將軍希爾根擊之復饒州六月  
畢力克圖復吳堡復綏德丁丑命將軍舒恕援廣東己卯命振武將軍佛尼勒  
開棧道援漢中庚辰上幸南苑行圍壬午張勇攻鞏昌江西官軍攻石峽失利  
副都統雅賴戰死甲申克蘭州畢力克圖復延安以軍興停陝西湖廣鄉試七  
月乙巳陳福勦定邊斬賊將朱龍庚戌江西官兵復浮梁樂平宜黃崇仁樂安  
諸縣八月戊午上幸南苑行圍洞鄂畢力克圖阿密達會攻王輔臣斬賊將郝  
天祥傅喇塔復黃岩壬申上奉太皇太后幸湯泉甲申上還京御經筵九月上  
次昌平詣明陵致奠長陵遣官分奠諸陵丙申上奉太皇太后還宮辛丑詔每



歲正月停刑著爲令冬十月癸亥康親王兵復太平樂清諸縣丙寅上謁孝陵  
戊辰祭孝陵乙亥還宮陳福及王輔臣戰於固原不利副將太必圖戰沒論平  
布爾尼功封賞有差及助順蒙古王貝勒沙津以次各管爵罰助逆奈曼等部  
十一月癸巳貝勒察尼復興山丁西復設詹事府官壬寅叛將馬雄糾吳三桂  
兵犯高州連陷廉州命簡親王喇布自江西援廣東是月鄭錦攻陷漳州海澄  
公黃芳度死之戕其家十二月丙寅立皇子胤礽爲皇太子頒詔中外加恩肆  
赦乙亥以勒爾錦師久無功奪其參贊巴爾布以下職寧夏兵變提督陳福死  
之壬午祫祭太廟是歲免湖廣河南七府五州縣災賦有差朝鮮入貢

十五年丙辰春正月丁亥以王進寶爲陝西提督駐秦州甲午以建儲恭上太  
皇太后皇太后徽號乙未升寧夏總兵官爲提督以趙良棟爲之辛丑上幸南  
苑行闈二月丁巳詔軍中克城禁殺掠壬戌命大學士圖海爲撫遠大將軍統  
轄全秦自貝勒洞鄂以下咸受節制癸酉上如鞏華城諭扈從勿踐春田乙亥  
吳三桂將高大傑陷吉安戊寅安親王岳樂擊三桂將於萍鄉敗之復萍鄉辛

已上御經筵贈死事副將張國彥太子太保子世職三月癸未贈海澄公黃芳  
度郡王丙戌王進寶佛尼勒大敗吳之茂於北山庚寅傳喇塔圖溫州曾養性  
祖宏勳悉衆來犯副都統紀爾他布擊走之辛卯岳州水師克君山庚子勒爾  
錦渡江與三桂之衆戰迭敗之乙巳賜彭定求等二百九人進士及第出身有  
差己酉勒爾錦與三桂之衆戰於太平街不利退守荊州壬子移趙賴提督江  
西夏四月辛丑馬雄祖澤清糾演賊犯廣東尙可喜老病不能軍屢疏告急援  
兵不時至至是賊逼廣州尙之信劫其父以降賊總督金光祖巡撫佟養鉅陳  
洪明提督嚴自明俱從降福建巡撫楊熙總兵拜音達奪門出舒恕莽依圖退  
至江西上聞廣東變作命移兵益江西五月壬午朔日有食之乙酉復設鄖陽  
撫治以楊茂勳任之丙戌鄂羅斯察漢汗使人來貢己亥撫遠大將軍圖海敗  
王輔臣於平涼六月壬子朔王輔臣降圖海以聞詔復其官授靖寇將軍立功  
自効諸將弁皆原之己卯耿繼善棄建昌遁上諭傑書曰耿精忠自撤其兵顯  
爲海寇所逼其乘機速進七月辛巳朔賜鄂羅斯使臣鞍馬服物大學士熊賜

履免以慕天顏爲江蘇巡撫庚子以姚文然爲刑部尙書郎廷相爲福建總督振武將軍佛尼勒會張勇王進寶擊吳之茂於秦州大敗之賊衆宵遁八月甲寅穆占復禮縣壬戌上奉太皇太后幸湯泉乙亥賴塔擊馬九玉於衢州復江山九玉棄軍遁九月庚辰賴塔進擊馬九玉破之復常山進攻仙霞關賊將金應虎迎降復浦城連下建甯癸未張勇復階州乙未耿精忠戕前總督范承謨山西巡撫達爾布有罪免丙午命穆占爲征南將軍移軍湖廣冬十月辛酉上奉太皇太后還宮乙丑康親王傑書師次延平賊將耿繼美以城降耿精忠遣子顯祚獻僞印乞降傑書入福州疏聞上命復其爵從征海寇自効其將曾養性叛將祖宏勳俱降浙江官兵復溫處二府撤兗州屯兵癸酉命講官進講通鑑十一月丙戌海寇犯福州都統喇哈達擊敗之內申官兵圍長沙甯海將軍貝子傅拉塔卒於軍十二月壬子遣耿昭忠爲鎮平將軍駐福州分統靖南藩軍叛將嚴自明犯南康舒恕擊走之丁巳尙之信使人詣簡親王軍前乞降且乞師疏聞許之吳三桂將吳世琮殺孫延齡踞桂林庚申海澄公黃芳世自

賊中脫歸上嘉之加太子太保與其弟黃藍並赴康親王大軍討賊建威將軍吳丹復山陽辛未頒賞諸軍軍士金帛丙子給祭太廟耿繼善棄邵武海寇據之副都統穆赫林擊之賊將彭世勳以城降是歲免直隸江南江西陝西各省三十四州縣災賦有差朝鮮入貢

十六年丁巳春正月丙申將軍額楚攻吉安失利命侍郎班迪勘軍狀二月己未上幸南苑行圍甲子大閱於南苑免福建今年租賦招集流亡丙寅以鄂內爲討逆將軍赴岳州丁卯康親王傑書敗鄭錦於興泉賊棄漳州遁復海澄遣郎中色度勞軍岳州察軍狀辛未以靳輔爲河道總督癸酉論花馬池勦寇功蒙古鄂爾多斯貝勒索諾木等皆爵有差乙亥上御經筵是月江西官軍復瑞金鉛山三月甲申以莽依圖爲鎮南將軍督兵廣東己丑諭禮部帝王克謹天成凡有垂象皆關治理設立專官謹司占候今星辰凌犯霜露非時欽天監不以實告有辜職掌其察議以聞庚寅命翰林長於詞賦書法者以所業進呈乙未原任總兵劉進忠苗之秀詣康親王軍降命隨大軍勦賊癸未詔軍興以

來文武官身殉封疆克全忠節其有旅櫬不能歸妻子不得養者深堪軫惻所  
在疆吏察明妥爲資送以昭褒忠至意甲辰含譽星見慶雲見乙巳吳三桂聚  
兵守長沙命勒爾錦進臨江圖海守漢中喇布鎮吉安莽依圖進韶州額楚駐  
袁州舒恕防贛州夏四月己未康親王傑書疏言處州府慶元縣民人吳臣任  
等不肯從賊結寨自固守義殺賊實爲可嘉已交浙江督撫效力者錄用歸農  
者獎賞其陣亡札委守備吳受南等並請恩卹從之辛酉上幸霸州行圍以伊  
桑阿爲工部尙書宋德宜爲左都御史丁卯提督趙賴敗土寇於泰和擒賊目  
蕭元戊辰予死事溫處道陳丹赤等官廕辛未上製大德景福頌書屏上太皇  
太后乙亥莽依圖師至南安嚴自明以城降遂克南雄入韶州五月己卯尙之  
信降命復其爵隨大軍討賊特擢謫戍知府傅宏烈爲廣西巡撫先是宏烈以  
首吳三桂反狀謫梧州及兵起宏烈上書陳方略故有是命旋加授撫蠻滅寇  
將軍與莽依圖規取廣西甲午額魯特噶爾丹攻敗喀爾喀車臣汗來獻軍實  
却之六月丁巳祖澤清以高州降秋七月庚子鄭錦將劉國軒自惠州犯東莞

尙之信大敗之賊將陳璉以惠州降甲辰上御便殿召大學士等賜坐論經史因及前代朋黨之弊諭加警戒以明珠覺羅勸德洪爲大學士八月丁未明宗人朱統錫起兵陷貴谿瀘縣己未上御經筵丙寅冊立貴妃鈕祜祿氏爲皇后佟佳氏爲貴妃戊辰傅宏烈等復梧州九月丙子命宗室公溫齊提督周卜世赴湖廣協勦癸未命額駙華善率師益簡親王軍科爾科代接駐江甯丁亥上發京師謁孝陵巡近邊丙申次喀拉河屯庚子次達希喀布秦昂阿近邊蒙古敖漢部札穆蘇等朝行在獻駝馬賜金幣吳三桂將胡國柱馬寶寇韶州將軍莽依圖額楚夾擊破之賊遁追之過樂昌復仁化冬十月甲辰上次湯泉癸丑還宮傅宏烈敗吳世琮於昭平復潯州福建按察使吳興祚敗朱統錫於光澤其黨執統錫降癸亥始設南書房命侍講學士張英中書高士奇入直十一月己卯吳三桂將韓大任陷萬安護軍統領哈克山擊敗之庚子封長白山神遣官望祭是月官兵復茶陵攸縣十二月乙巳海寇犯泉州提督段應舉等禦之辛亥海寇犯欽州游擊劉士貴擊敗之命參贊勅貝將軍額楚進取郴永己巳

以馮甦爲刑部侍郎辛酉金星晝見辛未禋祭太廟是歲免直隸江南江西陝西湖廣等省七十州縣災賦有差朝鮮入貢

十七年戊午春正月己丑副都統哈當總兵許貞擊韓大任於甯都大任遁之汀州詣康親王軍前降命執送京師壬辰以郭四海爲左都御史乙未詔曰一代之興必有博學鴻儒振起文運闡發經史以備顧問朕萬幾餘暇思得博通之士用資典學其有學行兼優文詞卓越之士勿論已仕未仕中外臣工各舉所知朕將親試焉於是大學士李蔚等荐曹溶等七十一人命赴京齊集請旨二月甲辰傅宏烈疏言吳三桂兵犯廣西詔額楚勒貝守梧州己未上御經筵製四書講疏義序丁丑皇后鈕祜祿氏崩諡曰孝昭皇后辛未莽依圖及吳世琮戰於平樂失利退守梧州命尙之信及都統馬九玉會師守梧州三月丙子湖廣官兵擊楊來嘉洪福敗之復房縣丁丑海寇犯石門黃芳世擊敗之癸巳祖澤清復叛應吳三桂閏三月癸卯上巡近畿乙丑命內大臣喀代尙書馬喇往科爾沁四十九旗蒞盟丁卯吳三桂將林興珠詣安親王軍前降詔封建義

侯隨軍勦賊逮問副都統甘度海阿進泰以在江西勦賊失機也夏四月庚午海寇蔡寅陷平和進逼潮州甲戌祖澤清犯電白尙之信額楚擊之澤清遁庚寅慶陽土賊袁本秀作亂官兵擊斬之五月庚子朔海澄公黃芳世卒於軍命其弟芳泰襲爵戊申福建總督郎廷相巡撫楊熙提督段應舉俱免以姚啓聖爲福建總督吳興祚爲福建巡撫楊捷爲福建水陸提督甲寅上幸西郊觀禾額魯特部濟農爲噶爾丹所逼入邊張勇逐出之六月壬申尙善遣林興珠敗三桂舟師於君山丁亥上以盛夏亢旱步禱於天壇是日大雨壬辰吳三桂將犯永興都統伯宜理布統領哈克山與戰敗歿海寇犯廉州總兵班紹明等擊走之吳三桂兵犯郴州副都統領岱與戰不利奔永興丁酉詔曰軍興以來將士披堅執銳盛暑祁寒備極勞苦朕甚憫焉其令兵部察軍中有負債責者官爲償之戰歿及被創者恤其家秋七月鄭錦陷海澄前鋒統領希佛副都統穆赫林提督段應舉死之甲辰鄭錦犯泉州甲寅以安珠護爲奉天將軍壬戌以魏象樞爲左都御史丙寅召翰林院學士陳廷敬侍讀學士葉方藹入直南書



房是月吳三桂僭號於衡州八月己卯安遠靖寇大將軍貝勒尙善卒於軍命貝勒察尼代之庚午西洋國王阿豐肅使臣入貢癸未上御經筵以御製詩集賜陳廷敬等乙未吳三桂死永興圍解頒行康熙永年歷丙申詔曰逆賊倡亂仰服天誅紆誤之徒宜從寬典其有悔悟來歸者咸與勿治九月上奉太皇太后幸湯泉管謁孝陵姚啓聖拉哈達大敗海寇於蜈蚣山劉國軒遁泉州圍解冬十月癸未上巡近邊次灤河閱三屯營兵己丑將軍鄂內敗吳應麒於石口丁酉皇四子胤禩生是爲世宗母曰吳雅氏十一月己亥拉哈達疏言海賊斷江東橋兵援泉州難進在籍侍讀學士李光地爲大軍嚮導修通險路接濟軍需請議敘得旨李光地前當變亂之初密疏機宜茲又迎接大兵備辦糧米深爲可嘉卽升授學士辛酉上奉太皇太后還宮癸亥命福建陸路提督楊捷加昭武將軍王之鼎爲福建水師提督十二月丁亥額楚傳宏烈及吳世琮戰於藤縣不利退守梧州乙未給祭太廟是歲免直隸江南江西湖廣等省七十州縣災賦有差朝鮮西洋入貢

十八年己未春正月戊申遣官分賑山東河南甲寅貝勒察尼督水師圍岳州賊將吳應麒遁復岳州上御午門宣捷設隨征總兵官以處降將旋裁之壬戌劉國軒犯長樂總督姚啟聖偕紀爾他布吳興祚擊敗之甲子岳樂復長沙二月丙寅傅宏烈戰吳世琮於梧州賊遁己巳詔數江西奸民從逆之罪仍免其通賦甲戌順承郡王勒爾錦督兵過江分復松滋枝江宜都澧州叛將洪福以舟師降戊寅簡親王喇布遣前鋒統領希佛復衡州賊將吳國貴夏國相遁庚辰詔軍前王大臣議進取雲貴事宜以周有德爲雲貴總督桑峨爲雲南提督趙賴爲貴州提督並隨王師進討以楊雍建爲貴州巡撫癸未以夸扎爲蒙古都統三月丙申朔御試博學鴻詞於保和殿授彭孫通等五十人侍讀侍講編修檢討等官修明史以學士徐元文葉方藹庶子張玉書爲總裁丁酉上幸保定縣行圍甲辰以徐治都爲湖廣提督將軍穆占擊吳國貴於永州敗之復永州道州永明己酉上還宮戊午賜歸允禔等百五十一人進士及第出身有差庚申岳州陣歿諸將喪至遣侍衛迎奠福建陣沒將士喪至亦如之夏四月丙

寅以楊茂勳爲四川總督駐鄖陽戊辰以萬正色爲福建水師提督己卯旱甚上步禱於天壇是日大雨莽依圖擊吳世琮於潯州敗走之壬寅上山阜成門觀禾五月庚戌劉國軒犯江東橋賴塔大戰敗之六月辛未詔曰盛治之世餘一餘三蓋倉廩足而禮教興水旱乃可無虞比聞小民不知積蓄一逢歉歲率致流移夫興儉化民食時用禮惟良有司是賴督撫等其選吏教民用副朕意己卯以希佛爲蒙古都統秋七月甲午靳輔疏報淮揚壩工成涸出田地招民種之丁未上視純親王隆禧疾隆禧薨乙卯額楚敗吳世琮於南寧世琮遁庚申京師地震詔發內帑十萬賑卹被震廬舍官修之壬戌召廷臣諭曰朕躬不德政治未協致茲地震示警悚息靡甯動求致災之由豈牧民之官苛取以行媚歟大臣或朋黨比周引用私人歟領兵官焚掠勿禁歟蠲租給復不以實歟問刑官聽訟或枉平民歟王公大臣未能束其下致侵小民歟有一於此皆是致災惟在大法而小廉政平而訟理庶幾仰格穹蒼弭消沴戾用是昭布朕心願與中外大小臣工共勉之八月癸亥朔將軍穆占復新寧甲子傅宏烈復柳

城融縣庚辰提督趙國祚將軍林興珠大破吳國貴於武岡國貴死復武岡州  
九月庚戌以地震禱於天壇辛亥命簡親王喇布守桂林甲寅金光祖執叛鎮  
祖澤清送京及其子良樞磔誅之冬十月辛未詔將軍張勇王進寶提督趙良  
棟孫思克取四川王進寶趙良棟行癸未王進寶克武關復鳳縣趙良棟復兩  
當十一月戊戌王進寶擊叛將王屏藩遁之廣元復漢中庚子趙良棟復略陽  
進克陽平關丁酉以許貞爲江西提督十二月壬戌以蔡毓榮爲綏遠將軍進  
定雲貴將軍佛尼勒吳丹克梁河關賊將韓晉卿遁復興安平利紫陽石泉漢  
陰洵陽白河及邯陽之竹山竹溪丁卯上幸南苑辛未詔安親王岳樂率林興  
珠班師壬午授趙良棟勇略將軍乙丑給祭太廟是歲免順天江南山東山西  
河南浙江湖廣等省二百六十一州縣災賦有差朝鮮琉球安南入貢  
十九年庚申春正月甲午趙良棟復龍安府進至綿竹僞巡撫張文等迎降遂  
入成都詔以良棟爲雲貴總督王進寶克朝天關復廣元王屏藩縊死生擒吳  
之茂壬子上幸鞏華城遣內大臣賜奠昭勳公圖賴墓二月辛酉朔詔吳丹會

趙良棟進取雲南王進寶鎮四川勒爾錦取重慶徐治都守荊州乙丑佛尼勒  
收順慶府潼川中江南部蓬縣廣安西充諸縣悉下丁卯詔莽依圖督馬九玉  
金光祖馬承蔭進兵雲南己巳上幸南苑丙子大閱以于成龍爲直隸巡撫徐  
治都大敗叛將楊來嘉復巫山進取夔州楊茂勳復大昌大甯癸未萬正色敗  
海寇於海壇三月辛卯吳丹復重慶達州奉鄉諸州縣悉定楊來嘉降送京乙  
未以伊圖爲雲南巡撫丁酉安親王岳樂師旋上勞於蘆溝橋辛丑馬承蔭誘  
執傅宏烈先是馬雄踞柳州死其子承蔭以柳州降至是復叛執宏烈送貴陽  
不屈死之平南將軍賴塔復銅山命守潮州備承蔭萬正色擊海寇於平海嶼  
克之進克涓州南日崇武諸嶼朱天貴降拉哈達擊劉國軒敗之遁廈門僞將  
蘇堪迎降進平玉洲石馬海澄馬州等十九寨復偕吳興祚取金門己酉察尼  
下辰龍關蔡毓榮復銅仁夏四月庚申朔以賴塔爲滿洲都統癸亥穆占董衛  
國敗吳應麒復沅州靖州進復黎平丁卯上以學士張英等供奉內廷日備顧  
問下部優敘高士奇杜訥均授翰林官己巳命南書房翰林每日晚講通鑑內

子上祈雨天壇翌日雨已卯頒行尙書講義王進寶以病回固原以其子總兵  
川子統軍駐保寧庚辰宗人府進王牒五月壬辰命甘肅巡撫治蘭州乙巳莽  
依圖會軍討馬承蔭復降命執送京師己酉山海關設關收稅六月甲子蔡毓  
榮復思南丁丑命五城粥廠再展三月遣太醫官三十員分治飢民疾疫壬午  
副都統馬爾哈齊管總馬順德以縱兵殺人論罪秋七月甲午停捐納官考選  
科道襲卹福建總督范承謨廣西巡撫馬雄鎮贈官予諡廢乙巳以折爾肯爲  
左都御史己酉解順承郡王勒爾錦大將軍撤還京八月戊辰上御經筵己巳  
命賴塔移駐廣州以博濟軍益之戊寅大學士索額圖免壬午將軍莽依圖卒  
於軍以勒貝代之甲申尙之信以屬人王國光訐告其罪擅殺之詔賜之信死  
其弟之節其黨李天植皆伏誅家口護還京師閏八月乙未命各將帥善撫緣  
旗軍士壬子以王永譽爲廣東將軍九月癸亥吳世璠使其將夏國柱馬寶潛  
寇四川譚宏復叛應之連陷瀘州永州夔州土匪應之命將軍吳丹噶爾漢提  
督范達理徐治都分道討之乙丑以賴塔爲平南大將軍率師進雲南戊寅吳

丹復瀘州冬十月仁懷失守罷吳丹以鄂克濟哈領其軍戊戌以阿密達爲蒙  
古都統噶爾漢復巫山壬寅大將軍康親王傑書師旋上郊勞之戊申彰泰穆  
占敗吳世璠於鎮遠噶爾漢擊譚宏於鐵開峽敗之是月王大臣議上師行玩  
誤之王貝勒大臣罪得旨勒爾錦革去王爵籍沒職禁尙善察尼均革去貝勒  
蘭布朱滿革去鎮國公餘各視官奪世職鞭責籍沒有差十一月丙辰朔冬至  
祀天於園丘彗星見詔求直言甲子貝子彰泰進復平越遂入貴陽逆渠吳世  
璠及吳應麒等夜遁安順石阡都勻三府皆下庚午以達哈里爲蒙古都統丙  
子川北總兵高孟敗彭時亨於南溪橋復營山進圍靈鷲寨斬僞將魏卿武甲  
申提督周卜世復思南十二月壬辰以徐元文爲左都御史甲午高孟復渠縣  
乙未提督桑峨大敗吳世璠於永甯追至鐵索橋賊焚橋遁土官龍天祐沙起  
龍造盤江浮橋濟大軍壬寅高孟復廣安州庚戌以郝浴爲廣西巡撫癸丑給  
祭太廟是歲免直隸江南山東山西陝西江西福建湖廣等省一百八十六州  
縣災賦有差朝鮮琉球入貢

二十年辛酉春正月壬申叛將李本深降械送京師癸酉總兵高孟復達州甲戌將軍噶爾漢復雲陽譚宏死進復忠州萬縣開縣乙亥命侍郎溫代治通州連河內子將軍穆占提督趙賴擊夏國相等走之復平遠辛巳增置講官詔法司慎刑是月鄭錦死其子克塽繼領所部二月己丑貝子彰泰師至安南衛擊賊將線絨於江西坡賊列象陣拒戰官兵分三隊奮擊大破之賊遁公圖達漢泰追擊復敗之復普安州新興所壬辰副都統莽奕祿敗賊張足法等於三山甲午詔凡三藩往事爲民害者悉除之蠲奉天鹽引大將軍賴塔師至廣西大破賊於黃草壩復安籠入曲靖高孟復東鄉敗彭時亨於月城寨戊戌增欽天監滿監副一員都統希福馬紉領塔復馬龍州楊林城入嵩明州賊遁穆占復黔西大定斬其僞將張維堅乙巳貝子彰泰大將軍賴塔將軍蔡毓榮先後入滇賊將胡國柄劉起龍迎拒官軍分擊敗之斬國柄起龍辛亥謁孝陵三月甲辰宣威將軍鄂克濟哈以失援建昌自劾詔以覺羅紀哈里代之辛酉恭仁孝皇后孝昭皇后於昌瑞山陵詔行在批閱章奏令大學士審校壬戌胡國柱犯



建昌將軍佛尼勒擊走之復馬湖癸亥馬寶棄遵義犯瀘敘詔佛尼勒趙良棟急擊滇賊勿令回援丙寅贈卹福建死事運使高天爵知府張端午等官廕戊辰土官陸道清以永甯降癸酉上奉太皇太后幸遵化湯泉夏四月甲辰朔王用子復納谿江安仁懷合江己酉貝子彰泰遣使招撫諸路武定大理臨安永順姚安皆降壬子上奉太皇太后還宮五月癸丑朔提督周卜世取遵義降僞官金仕俊等復眞安州仁懷桐梓綏陽等縣己未遣官察閱蒙古蘇尼特等旗被旱災狀乙丑詔行取州縣曾陷賊中者勿選科道辛巳大將軍貝子彰泰報抵雲南省城僞將李發美以鶴慶麗江二府降六月戊子除山西陝西房號銀秋七月丁巳以禮部尙書郭四海兼管刑部庚申詔四川民田爲弁兵所占者察還之辛酉都統希福提督桑峨擊馬寶於烏木山大敗之馬寶降械送京師誅之乙丑趙良棟遣總兵李芳述擊敗胡國柱復建昌入雲南戊辰詔圖海率王輔臣還京壬申賜宴瀛臺員外郎以上皆與焉賜綵幣己卯以施琅爲福建水師提督規取臺灣改萬正色陸路提督八月辛巳朔日有食之乙巳上御經

延九月辛亥上巡幸畿甸故平南王尙可喜喪至通州賜銀八千兩遣官奠茶  
果戊午上次雄縣召見知州吳鑑問渾河水決居民被災狀內寅上還京詔停  
本年秋決壬申復連丁工銀冬十月癸未偏沅巡撫韓世琦敗賊將黃明於古  
州甲申額魯特噶爾丹入貢乙酉大學士圖海師旋上嘉勞之壬辰詔撤平南  
靖南兩藩弁兵還京癸卯詔免土魯番貢犬馬十一月辛亥詔從賊諸人除顯  
抗王師外餘俱削官放還以諸邁爲漢軍都統癸亥定遠平寇大將軍貝子彰  
泰平南大將軍都統賴塔勇略將軍總督趙良棟綏遠將軍總督蔡毓榮疏報  
王師於十月二十八日入雲南城吳世璠自殺傳首吳三桂析骸示中外誅僞  
相方光琛餘黨降雲南平是日以昭告孝陵車駕次薊州丁卯祭孝陵辛未召  
貝子彰泰將軍趙良棟還京乙亥上獵於南山發矢殪三虎己卯迴鑾十二月  
戊子設滿洲將軍駐荊州漢軍將軍駐漢中癸巳羣臣請上尊號勅曰自逆賊  
倡亂羣民響應師旅疲於征調閭閻敝於轉輸加以水旱頻仍災異疊見此皆  
朕躬不德所致賴宗社之靈削平庶孽方當登進賢良與民休息而乃侈然自

足爲無謂之潤色能勿惡乎其勿行補廣西鄉試戊戌大學士圖海卒己亥上御太和門受賀宣捷中外癸卯加上太皇太后皇太后徽號頒發恩詔賜宗室賚外藩子封贈廣解額舉隱逸旌節孝恤孤獨罪非常赦不原者悉赦除之以于成龍爲江南江西總督吳興祚爲廣東廣西總督丁未祫祭太廟是歲免直隸江南江西山東山西浙江福建等省七十五州縣災賦有差丁戶一千七百二十三萬徵銀二千二百一十八萬三千七百六十兩有奇鹽茶課銀二百三十九萬九千四百六十八兩鑄錢二萬三千一百三十九萬朝鮮厄魯特入貢

清史稿

本紀七

聖祖本紀二

二十一年壬戌春正月壬戌上元節賜廷臣宴觀燈用柏梁體賦詩上首唱云  
麗日和風被萬方廷臣以次屬賦上爲製昇平嘉宴詩序刊石於翰林院丙寅  
調蔡毓榮爲雲貴總督戊辰王大臣奏曰耿精忠累世王封甘心叛逆分擾浙  
贛及於皖徽設非師武臣力蔓延曷極李本深劉進忠等多年提鎮高官厚祿  
不能革其鴟音俯首從賊抑有何益均宜從嚴懲治大爲之防以爲世道人心  
之範謹擬議請旨得旨耿精忠曾養性白顯中劉進忠李本深均磔死梟首耿  
精忠之子耿繼祚李本深之孫李象乾李象坤其姪李濟祥李濟民暨祖宏勳  
等俱處斬爲賊絰誤之陳夢雷李學詩金鏡田起蛟均減死一等己巳特封安  
親王岳樂子岳希爲僖郡王二月庚辰以達都爲左都御史癸未以平演遣官  
告祭嶽瀆古帝陵先師闕里甲申上御經筵丙戌以佟國維爲領侍衛內大臣  
辛卯上齋居景山爲太皇太后祝釐癸巳上東巡啓鑒皇太子胤祊從蒙古王

貝勒等請上尊號不許以穆占爲蒙古都統妖人朱方旦伏誅戊戌次山海關遣大臣祭伯夷叔齊廟三月壬子上謁福陵昭陵駐蹕盛京甲寅告祭於福陵丙辰告祭於昭陵大賚將軍以下至守陵官年老致仕官及甲兵廢閒者曲赦盛京甯古塔蠲蹕路所過租稅己未上謁永陵行告祭禮上具啓太皇太后皇太后進奉鱧魚鯖魚庚申上由山道幸烏拉行圍辛酉望祭長白山乙亥泛舟松花江夏四月辛巳上回鑾賜甯古塔將軍副都統宴賚致仕官及甲士乙巳次中後所流人王廷試子德麟叩關乞代父戍部議不准上諭王德麟所言情甚可憫遇朕來此亦難得之遭其父子俱讀書人可均釋回五月辛亥上還京壬子詔甯古塔地方苦寒流人改發遼陽己未大學士杜立德乞休溫旨允之丙寅免吉林貢鹽減省徭役戊辰以王熙爲大學士六月乙酉以修國瑤爲福州將軍庚寅以公倭赫爲蒙古都統甲辰大學士馮溥乞休溫旨允之差官護送馳驛回籍秋七月庚戌以杭艾爲左都御史甲寅命刑部尙書魏象樞吏部侍郎科爾坤巡察畿輔豪強虐民者拘執以聞乙卯以三逆蕩平宣示蒙古八

月丙子詔內閣學士參知政事癸卯譚宏之子譚天祕譚天倫伏誅九月戊申  
賜蔡升元等一百七十六人進士及第出身有差甲子詔每日御朝聽政春夏  
以辰初秋冬以辰正冬十月甲申定遠大將軍貝子彰泰征南大將軍都統賴  
塔凱旋上郊勞之己丑以黃機吳正治爲大學士辛卯詔重修太祖實錄纂修  
三朝聖訓平定三逆方略十一月甲寅以李之芳爲兵部尙書希福爲西安將  
軍瓦岱爲江甯將軍戊午詔廣西建雙忠祠祀巡撫馬雄鎮傅宏烈庚申以趙  
賴爲漢軍都統戊辰以施維翰爲浙江總督以噶爾漢爲滿洲都統十二月己  
卯前廣西巡撫陳洪起從賊論死命流甯古塔癸未以許貞爲廣東提督戊子  
錄達海之孫陳布祿爲刑部郎中癸巳論行軍失律罪簡親王喇布奪爵餘遣  
戍降黜有差庚子耶談使黑龍江還上羅刹犯邊事狀命甯古塔將軍巴海副  
都統薩布素率師防之建木城於黑龍江呼馬爾分軍屯田是歲免直隸江南  
江西山東山西浙江湖廣等省七十八州縣衛被災額賦有差朝鮮安南入貢  
二十二年癸亥春正月乙卯宴賓廷臣己未上閱官校較射二月癸酉帥顏保

罷以介山爲禮部尙書喀爾圖爲刑部尙書甲申上幸五臺山三月戊申還京  
戊午以噶爾漢爲荊州將軍彭春爲滿洲都統夏四月乙亥命提鎮諸臣以次  
入覲庚辰命巴海迴駐烏拉薩布素瓦禮祐帥師駐額蘇里備邊辛卯以公坡  
爾盆爲蒙古都統五月丙午設漢軍火器營甲子命施琅征臺灣六月丁丑上  
閱內庫頒賞廷臣幣器戊寅以伊桑阿爲吏部尙書杭艾爲戶部尙書癸未上  
奉太皇太后避暑古北口閏六月戊午施琅克澎湖庚申諭飭刑官勘獄勿淹  
繫秋七月車駕次胡圖克圖賜隨圍蒙古王公冠服兵士銀幣甲午上奉太皇  
太后還宮八月庚子命經筵大典大學士以下侍班戊申以哈占爲兵部尙書  
科爾坤爲左都御史戊辰施琅疏報師入臺灣鄭克塽率其屬劉國軒等迎降  
臺灣平詔錫克塽國軒封爵封施琅靖海侯將士擢賞有差九月癸酉以丁思  
孔爲偏沅巡撫己卯上奉太皇太后幸五臺山壬辰次長城嶺太皇太后以道  
險迴鑾上如五臺山限額魯特入貢人數冬十月上至五郎河行宮奉太皇太  
后還京丁未羣臣以台灣平請上尊號不許癸亥以薩布素爲新設黑龍江將

軍乙丑詔沿海邊民歸復田里十一月癸未授羅剎降人宜番等官戊子上以海寇平祭告孝陵癸巳上巡幸邊界十二月甲辰上還京丁未從逆土司陸道清伏誅壬子以紀爾他布爲蒙古都統乙卯易經日講成上製序頒行尙書朱之弼都御史徐元文以薦舉非人免乙丑哈祭太廟是歲免山東山西甘肅江西湖廣廣西等省二十州縣災賦有差朝鮮琉球入貢

二十三年甲子春正月辛巳上幸南苑行圍丙戌加封安親王岳樂子袁端爲勤郡王壬辰命整肅朝會禮儀羅剎踞雅克薩尼布潮二城飭斷其貿易薩布素以兵臨之二月乙巳上御經筵癸丑上巡幸畿甸丙寅還駐南苑大學士黃機罷乙丑給事中王承祖疏請東巡命查典禮以聞三月壬申以劉國軒爲天津總兵官陞辭賜白金二百緞匹三十內厰鞍馬一丁亥上製五臺山碑文召示廷臣諭之曰近人每一文出不樂人點竄此文之所以不工也夏四月己酉設台灣府縣官隸福建行省壬子刑部左侍郎宋文運乞休命加太子少保致仕庚申諭凡一事經關兩部俱會同具奏乙丑諭講官講章以精切明晰爲尙



母取繁衍朕閱張居正尙書四書直解義俱精實無泛設之詞可爲法也江南  
江西總督于成龍卒予祭葬諡清端五月丁卯裁浙江總督以公瓦山爲滿洲  
都統己巳修大清會典丙子以孫思克爲甘肅提督辛巳命廷臣察舉清廉官  
九卿舉格爾古德蘇赫范承勳趙崙崔隼張鵬翮陸隴其癸未起巴海爲蒙古  
都統甲申上幸古北口詔蹕路所經勿踐田禾乙未惠郡王博翁果諾坐陪祀  
不謹削爵王大臣議奏侍郎宜昌阿巡撫金僑查看尙之信家產隱蝕銀八十  
九萬並害殺商人沈上達應斬郎中宋俄託員外郎卓爾圖及審讞不實之侍  
郎禪塔海應絞從之詔追銀勿入內務府交戶部充餵六月丁未琉球請遣子  
弟入國子監讀書許之甲寅暹羅國王森列拍臘照古龍拍臘馬呼陸坤司由  
提呀菩挨遣陪臣言貢船到虎跳門阻滯日久每致損壞乞諭粵省官吏准其  
放入河下早得登岸貿易採辦勿被攔阻從之諭一等侍衛阿南達曰朕視外  
旗蒙古與八旗一體今巡行之次見其衣食困苦深用惻然爾卽傳諭所過地  
方蒙古無告者許其來見詢其生計於是蒙古扶老携幼叩首行宮門上詳問

年齒生計給與銀兩布疋乙卯上閏牧羣賜從臣馬刑部尙書魏象樞再疏乞  
休允之丁巳以湯斌爲江蘇巡撫七月乙亥以宋德宜爲大學士辛巳上駐蹕  
英尼湯泉以佟佳爲蒙古都統八月戊申上還京甲寅大學士李蔚卒遣官奠  
茶酒賜祭葬諡文勤甘肅提督靖逆侯張勇卒予祭葬諡襄壯九月甲子朔停  
本年秋決丙寅以張士甄爲刑部尙書博濟爲滿洲都統以錢貴更鑄錢減四  
分之一聽民採銅鉛勿稅丁卯改梁清標爲兵部尙書余國柱爲戶部尙書庚  
午以蒙古都統阿拉尼兼理藩院尙書癸酉以陳廷敬爲左都御史莽奕祿爲  
蒙古都統丁亥詔南巡車駕所過賜復一年辛卯上啓鑾冬十月壬寅上次泰  
安登泰山祀東嶽辛亥次桃源閱河工慰勞役夫戒河吏勿侵漁臨視天妃閘  
與河臣靳輔論治河方略壬子上渡淮甲寅次高郵湖登岸行十餘里詢耆老  
疾苦丙辰上幸焦山金山渡揚子江舟中顧侍臣曰此皆戰艦也今以供巡幸  
然艱難不可忘也丁巳弛海禁戊午上駐蘇州庚申幸惠山諭巡撫百姓遠道  
來觀其不能歸者資遣之十一月壬戌朔上駐江甯癸亥詣明陵致奠乙丑迴

鑾泊舟燕子磯讀書至三鼓侍臣高士奇請曰聖躬過勞宜少節養上曰朕自  
五齡受書誦讀恒至夜分樂此不爲疲也丁卯命伊桑阿薩穆哈視察海口諭  
曰海口沙淤年久遂至壅塞必將水道疏通始免昏墊即多用經費亦所不惜  
辛未臨閱高家堰次宿遷過白洋河賜老人白金戊寅上次曲阜己卯上詣先  
師廟入大成門行九叩禮至詩禮堂講易經上大成殿瞻先聖象觀禮器至聖  
蹟殿覽圖書至杏壇觀植桮入承聖門汲孔井水嘗之顧問魯壁遺迹博士孔  
毓圻占對甚詳賜官助教詣孔林墓前酌酒書萬世師表額留曲柄黃蓋賜衍  
聖公孔毓埏以次日講諸經各一免曲阜明年租賦庚寅上還京以馬哈達爲  
滿洲都統十二月壬辰朔以石文炳爲漢軍都統癸卯命公瓦山視師黑龍江  
佛寶佛可托副之備羅刹甲辰賜公鄭克塽伯劉國軒馮錫范田宅隸漢軍丙  
午命流人值冬令過嚴寒時乃遣內辰上謁陵賜守陵官兵牛羊己未還宮是  
歲免直隸江南江西河南湖廣等省二十六州縣災賦有差朝鮮遼羅入貢  
二十四年乙丑春正月癸酉享太廟諭曰贊禮郎讀祝讀至朕名聲輒不揚失

父前子名之義自今俱令宣讀癸未命公彭春赴黑龍江督察軍務命侯林興  
珠率福建藤牌兵從之以班達爾沙修實馬喇參軍事乙丑試翰詹官於保和  
殿上親定甲乙其不稱者改官戊子命蒙古科爾沁十旗所貢牛羊送黑龍江  
軍前二月庚子命周公後裔東野氏爲五經博士予祀田以額赫納爲滿洲都  
統癸卯上御經筵乙卯上巡幸畿甸庚申還京再賜劉國軒第宅以范承勳爲  
廣西巡撫三月壬戌上撰孔子廟碑文成親書立碑重修賦役全書辛巳賜陸  
肯堂等一百二十一人進士及第出身有差夏四月辛卯予宋儒周敦頤裔孫  
五經博士丙申授李之芳輕車都尉世職戊戌馬喇以所俘羅剎上獻命軍前  
縱遣之辛丑詔以直隸連年旱災通賦六十餘萬盡免之並免今年正賦三分  
之一詔醫官博採醫林載籍勒成一書庚戌設內務府官學五月癸未詔厄魯  
特濟農違離本部嚮化而來宜加愛養予之田宅修政治典訓甲申以原廣西  
巡撫郝浴歷官廉潔悉免應追帑金彭春等攻雅克薩城羅剎來援林興珠率  
藤牌兵迎擊於江中破之沈其船頭人額里克舍乞降六月庚寅朔上巡幸塞

外啓鑒戊戌上還京癸卯詔曰鄂羅斯入我邊塞侵擾鄂倫春索倫赫哲飛牙  
喀等處人衆盤踞雅克薩四十年今克奏厥績在事人員咸與優叙應於何地  
永駐官兵即會議具奏上試漢軍筆帖式監生曳白八百人均斥革令其讀書  
再試乙巳上巡幸塞外秋七月壬申設吉林黑龍江驛路凡十九驛八月丙午  
上駐蹕拜巴哈昂河賜朝行在蒙古王貝勒冠服銀幣九月戊午朔上聞太皇  
太后違豫回鑾己未上馳回京趨侍醫藥旋即康復辛巳陝西提督王進寶卒  
贈太子太保予祭葬諡忠勇甲申命副都統溫代納秦駐防黑龍江博定修築  
墨爾根城增給夫役兼令屯田乙酉以吳英爲四川提督冬十月甲午上幸南  
苑戊戌厄魯特使人伊特木坐殺人棄市己亥以瓦代爲滿洲都統庚子定外  
藩王以下歲貢羊一隻酒一瓶丙午慶雲見己酉靳輔請下河涸出田畝佃民  
收價償工費上曰如是則累民矣其勿取甲寅以博齊爲江南將軍十一月丁  
巳朔日有食之庚申以莽奕祿爲滿洲都統塔爾岱爲蒙古都統甲戌上大閱  
於蘆溝橋丙子靳輔于成龍遵召至京會議治河方略靳輔議開六河建長隄

于成龍請開濬海口故道大學士以聞上云二說俱有理可詢高寶七州縣京官孰利民侍讀喬萊奏從于成龍議則工易成而百姓有利上令于成龍興工旋以民情不便而止己卯上賜鄂內坤巴圖魯散秩大臣聽其家居二人皆太宗朝舊臣也乙酉詔曰日蝕於月朔越十六日月食一月之中薄蝕互見天象示儆宜亟修省廷臣集議以聞十二月庚寅以察尼爲奉天將軍己亥謁孝陵癸卯上還宮甲寅給祭太廟是歲免江南江西山東山西湖廣等省七十四州縣衛災賦有差朝鮮琉球噶爾丹入貢

二十五年丙寅春正月丙申命馬喇督黑龍江屯田鄂羅斯復據雅克薩命薩布素率師逐之二月甲辰重修太祖實錄成丁未詔曰國家削平逆孽戡定遐荒惟宜宣布德意動其畏懷近見雲貴川廣大吏不善撫綏頗行苛虐貪黷生事假借邀功朕思土司苗蠻旣歸王化有何桎梏格鬬靡甯其務推示誠信化導安輯以副朕撫馭遐荒至意停四川採運木植己酉文華殿成壬子告祭至聖先師於傳心殿癸丑上御經筵以津進爲領侍衛內大臣三月戊午命修棲

流所已未命纂修一統志甲戌以湯斌爲禮部尙書兼管詹事府夏四月乙酉朔命阿拉尼往喀爾喀七旗蒞盟庚寅詔曰趙良棟前當逆賊盤踞漢中首先入川功績懋著復領兵直抵雲南攻克省城之後獨能恪守法紀廉潔自持深爲可嘉今已衰老解任應復其勇略將軍兵部尙書總督以示眷注命耶談班達爾沙馬喇赴黑龍江參贊軍務贈陝西死事平逆將軍畢力克圖參贊阿爾瑚世職甲午詔求遺書戊申調萬正色雲南提督以張雲翼爲福建陸路提督辛亥始令順天等屬旗莊屯丁編查保甲與民戶同閏四月辛未以范承勳爲雲南貴州總督五月丁亥詔毀天下淫祠六月乙亥錄平南大將軍賴塔都統趙賴以次功各予世職有差戊寅以阿蘭泰爲左都御史秋七月戊申錫荷蘭國王耀漢連氏甘勃氏文綺白金命其使臣貢書致鄂羅斯吏部奏定侍讀庶子以下各官學問不及者以同知運判外轉從之辛亥上巡幸塞外八月辛未上駐蹕烏爾格蘇台丙子上還京以索額圖爲領侍衛內大臣丁丑詔薩布素圍雅克薩城遇其援師以博定參軍事戊辰詔天下學宮崇祀先儒庚辰詔增

孔林地十一頃有奇從衍聖公孔毓璣請也除其賦九月己丑以班達爾沙爲蒙古都統乙巳以圖納爲四川陝西總督丁未以陳廷敬爲工部尙書馬齊爲山西巡撫己酉鄂羅斯察漢汗使來請解雅克薩之圍許之是月內大臣拉篤祜奉詔與羅卜藏濟農及噶爾丹定地而還冬十月丙辰調張士甄爲禮部尙書以胡昇猷爲刑部尙書十一月庚子上謁孝陵賞蒙古喀喇沁兵征浙江福建有功者十二月癸丑上還宮丙辰命侍郎薩海督察鳳凰城屯田癸亥諭糾儀御史糾察必以嚴設朕躬不敬亦當舉奏戊寅給祭太廟是歲免直隸江南浙江湖廣甘肅等省二十七州縣被災額賦有差朝鮮安南荷蘭吐魯番入貢二十六年丁卯春正月戊子遣醫官往治雅克薩軍士疾羅利顯就醫者並醫之內申蒙古土謝圖汗車臣汗及濟農合疏請上尊號不許乙巳大學士吳正治乞休允之二月癸丑上大閱於蘆溝橋原任湖廣總督蔡毓榮隱蔽吳三桂孫女爲妾匿取逆財減死鞭一百枷號三月籍沒並其子發黑龍江原讞尙書禧佛等坐隱庇黜革有差甲寅以余國柱爲大學士庚申命八旗都統副都統



更番入值紫禁城丁卯以張玉書爲刑部尙書壬申戶部奏濬墅關監督桑額溢徵銀二萬一千餘兩得旨設立樞關原爲稽察奸宄桑額多收額銀乃私封便民橋以致擾害商民著嚴加議處嗣後司樞官有額外橫徵者該部其嚴飭之三月己丑以董訥爲江南江西總督癸巳以王鴻緒爲左都御史癸卯上御太和門視朝諭大學士等詳議政務闕失僉以無弊可陳對上曰堯舜之世府修事和然且兢兢業業不敢謂已治已安漢文帝亦古之賢主賈誼猶指陳得失直言切諫今但云主聖臣賢政治無闕豈國家果無一事可言耶大小臣工各宜盡心職業視國事如家事有所見聞入陳無隱以馬世濟爲貴州巡撫夏四月己未上諭大學士曰纂修明史諸臣曾參看前明實錄否若不參看實錄虛實何由悉知明史成日應將實錄並存今後世有所考證丙寅以田雯爲江蘇巡撫癸酉罷科道侍班五月己亥宗人府奏平郡王納爾都打死無罪屬人折傷手足請革爵圈禁得旨革爵免圈禁庚辰詔曰今茲仲夏久旱多風陰陽不調災孰大焉用是減膳撤樂齋居默禱雖降甘霖尚未霑足皆朕之涼德不

能上格天心政令有不便於民者更之罪非常赦不原者咸赦除之戊子上召陳廷敬湯斌十二人各試以文諭曰朕閒與熊賜履講論經史有疑必問繼而張英陳廷敬以次進講大有裨益德格勒每好評論時人學問朕心以爲不然故茲召試茲判然矣壬辰上製周公孔子孟子廟碑文御書勒石六月丁酉上素服步行祈雨於天壇是夜雨辛丑改祀北海於混同江以楊素蘊爲安徽巡撫秋七月戊子鄂羅斯遣使議和命薩布素退兵丙午戶部請裁京員公費得旨勿裁八月己酉上巡幸塞外癸丑次博洛和屯行圍甲戌賜外藩銀幣九月己卯上還京辛巳于成龍進嘉禾上曰今夏乾旱幸而得雨未足爲瑞也壬午以李之芳爲大學士乙未調湯斌爲工部尙書起徐元文爲左都御史冬十月癸丑上巡幸畿甸甲子上還駐暢春園十一月甲申以李正宗爲漢軍都統丙申太皇太后不豫上詣慈寧宮侍疾十二月乙巳朔上爲太皇太后不豫親製祝文步行禱於天壇癸亥以王永譽爲漢軍都統乙丑湖廣巡撫張汧爲御史陳紫星劾其貪婪侍郎色楞額初按不實至是命于成龍馬齊開音布馳往提

拏究擬論死陳紫星內升己巳太皇太后崩上哭踊視檢割辦服衰居慈寧宮  
廬次甲戌除夕羣臣請上還宮不允是歲免直隸山東山西江西等省四州縣  
災賦有差朝鮮入貢

二十七年戊辰春正月戊子上居乾清門外左幕次乙未釋服丁酉聽政二月  
壬子大學士勒德洪明珠余國柱有罪免李之芳罷御史郭琇具疏論列也尙  
書科爾昆佛倫熊一瀟俱罷甲寅以梁清標伊桑阿爲大學士李天馥爲工部  
尙書張玉書爲兵部尙書徐乾學爲刑部尙書定宗室襲封年例三月乙亥以  
馬齊爲左都御史辛巳上召廷臣及董訥斬輔于成龍佛倫熊一瀟等議河務  
次日亦如之乙酉色楞額以按張汧獄欺罔論死總督徐國相以徇庇侍郎王  
遵訓等以濫舉俱免官己丑以王新命爲河道總督辛卯裁湖廣總督丁酉論  
河工在事互訐諸臣董訥熊一瀟斬輔慕天顏孫在豐俱削官并趙吉士陳潢  
罪之己亥增遣督捕理事官張鵬翮兵科給事中陳世安會內大臣索額圖與  
鄂羅斯議約定界壬寅賜沈廷文等一百四十六人進士及第出身有差李光

地坐安舉德格勒議處得旨李光地前於台灣一役有功仍以學士用夏四月  
癸卯朔日有食之戊申以傅拉塔爲江南江西總督己酉上躬送太皇太后梓  
宮奉安暫安奉殿其後起陵是日昭西陵迴蹕至薊州除髮甲寅以厄魯特侵  
喀爾喀使諭噶爾丹戊辰上還宮庚午命侍郎成其範徐廷璽查閱河工五月  
己卯吏部尙書陳廷敬刑部尙書徐元文以疾罷甲午以紀爾他布爲兵部尙  
書丙申上謁祭暫安奉殿六月甲辰湖廣督標裁兵夏逢龍作亂踞武昌巡撫  
柯永昇投井死署布政使糧道葉映榴罵賊遇害命瓦岱佩振武將軍印討之  
庚申阿喇尼奏噶爾丹侵厄爾德尼招哲卜尊丹巴士謝圖汗遁發兵防邊戊  
辰起熊賜履爲禮部尙書徐元文爲左都御史以翁叔元爲工部尙書秋七月  
癸酉以輔國公化善爲蒙古都統乙酉湖廣提督徐治都大敗夏逢龍於應城  
於鯉魚套焚賊舟賊遁黃岡丙戌上巡幸塞外戊子南陽總兵史孔華復漢陽  
庚寅瓦岱復黃州獲夏逢龍磔誅之賊平壬午雲南提督萬正色侵冒兵餉按  
律論死上念其前陷賊時抗志不屈行間血戰勞績甚多免死革提督仍留世

職壬辰上駐喀爾必哈哈達有峰舊名納哈里高百數十丈上發數矢皆過峰頂賜今名八月癸卯上駐巴顏溝行圍葉映榴遺疏至贈工部侍郎下部優卹乙卯張玉書奏查閱河工多用靳輔舊議九月壬申遣彭春諾敏率師駐歸化城防邊是時喀爾喀爲噶爾丹攻破徙近邊內遣阿喇尼往宣諭之並運米賑撫辛卯上還京癸巳復設湖廣總督以丁思孔爲之冬十月癸卯移楊素蘊爲湖廣巡撫庚戌以輔國公綽克託爲奉天將軍乙卯上大行太皇太后尊諡曰孝莊文皇后辛酉升祔太廟頒詔中外十一月辛卯荊州將軍噶爾漢等坐討賊逗遛奪職鞭一百官吏從賊受官者逮治餘貸之十二月庚子以希福爲蒙古都統甲辰建福陵昭陵聖德神功碑御製碑文上謁孝莊山陵乙巳以尼雅翰爲西安將軍乙巳進張玉書爲禮部尙書徐元文刑部尙書再進戶部尙書丙寅上還京兵部工部會疏福建前造砲船核減工料銀二萬餘兩應著落故總督姚啟聖名下追賠上以姚啟聖經營平臺甚有功績毋庸著追是歲免江南江西湖廣雲南貴州等省三十三州縣災賦有差朝鮮琉球入貢

二十八年己巳春正月庚午詔南巡臨閱河上丙子啓鑒詔所過勿令民治道  
獻縣民獻嘉禾壬午詔免山東地丁額賦甲申上駐濟南乙酉望祀泰山庚寅  
次剡城閱中河壬辰次清河癸巳詔免江南積欠二十餘萬乙未上駐揚州詔  
曰朕觀風問俗鹵簿不設扈從僅三百人頃駐揚州民間結綵盈衢雖出自愛  
敬之誠不無少損物力其前途經過郡邑宜悉停止二月辛丑上駐蘇州丁未  
駐杭州詔廣學額資軍士復因公降謫官賜扈從王大臣以次銀幣賜駐防耆  
民金辛亥渡錢塘江至會稽山麓壬子祭禹陵親製祭文書名行九叩禮製頌  
刊石書額曰地平天成癸丑上還駐杭州閱騎射賜將軍以及官兵大酺丁巳  
次蘇州故湖廣糧道葉映榴之子敷迎鑾爲其父請諡上書忠節二大字賜之  
松江百姓建碑祈壽獻進碑文江南百姓籲留停蹕獻土物爲御食委積岸上  
令取米一撮果一枚爲留一日浙江巡撫金鉉有罪削職遣戍以張鵬翮爲浙  
江巡撫增設武昌荊州常德岳州水師癸亥上駐蹕江甯甲子祭明陵賜江甯  
京口駐防高年男婦白金乙丑上閱射賜酺上詣觀星臺與學士李光地咨論

星象參宿在觜宿之先恒星隨天而動老人星合見江南非隱見也江甯士民  
顓留聖駕爲留二日三月戊辰朔發江甯甲戌閱高家堰指授治河方略丙戌  
上還京聞安親王岳樂之喪先臨其第哭之乃還宮丁亥命八旗科舉先試騎  
射戊子詔靳輔治河勞績昭然可復原官丁酉增設八旗火器營副都統領之  
閏三月壬子予安親王岳樂祭葬立碑諡曰和己未上謁陵丙午謁孝莊皇后  
山陵謁孝陵辛酉上還京夏四月乙亥朔上製孔子贊序及顏曾思孟四贊頒  
於學宮壬辰復命索額圖等赴尼布楚與鄂羅斯定邊界喀爾喀外蒙古內附  
告饑命內大臣伯費揚古往賑撫之命臺灣鑄錢五月乙巳以阿蘭泰徐元文  
爲大學士顧八代爲禮部尙書郭琇爲左都御史壬戌頒行孝經衍義癸亥命  
歸化城屯兵備邊六月乙亥以佟寶爲甯古塔將軍兩廣總督吳興祚以鼓鑄  
不實黜官秋七月以石琳爲兩廣總督癸卯冊立貴妃佟氏爲皇后甲辰皇后  
崩諡曰孝懿八月癸酉上巡幸邊外戊寅駐博洛和屯賜居民銀米九月癸卯  
上還京戊午以倭赫爲蒙古都統額駙穆赫爲漢軍都統冬十月丙寅以耶談

爲滿洲都統辛未增設喀爾喀兩翼扎薩克招集流亡編置旗隊癸酉左都御史郭琇以致書本省巡撫請託降官甲戌葬孝懿皇后上臨送是月岷州生番內附十一月丙申上還宮辛酉孝懿皇后祔奉先殿十二月乙丑詔免雲南二十一年至二十三年民欠丙寅上朝皇太后於慈寧新宮戊辰以張英爲工部尙書乙亥內大臣索額圖疏報與鄂羅斯立約定尼布楚爲界立碑界上以五體文書碑是歲免直隸浙江湖北等省十一州縣災賦有差朝鮮入貢

二十九年庚午春正月癸丑上幸南苑庚申遣官賑蒙古喀爾喀二月甲子以岳樂子馬爾渾嗣封安郡王乙丑遣大臣巡視直隸災區流民五城粥廠寬期倍發銀米增置處所己巳上謁孝莊山陵謁孝陵庚午大雨癸酉上還京甲戌上御經筵戊子起陳廷敬爲左都御史三月壬辰朔除長蘆新增鹽課乙未詔修三朝國史癸卯命都統額赫納護軍統領馬賴前鋒統領碩鼎率師征厄魯特先是噶爾丹兵侵喀爾喀迭詔諭解不從兵近邊塞至是命額赫納等蒞邊禦之辛亥除雲南黑井加增鹽課以張思恭爲京口將軍夏四月丁丑以旱赦



殊死以下繫囚甲申建子思子廟於闕里大清會典成五月辛卯朔命九卿保舉行取州縣堪爲科道者六月癸酉大學士徐元文免戊寅噶爾丹追喀爾喀侵入邊命內大臣蘇爾達赴科爾沁徵蒙古師備禦命康親王傑書恪慎郡王岳希師駐歸化城秋七月庚寅朔以張英爲禮部尙書以董元卿爲京口將軍辛卯噶爾丹入犯烏珠穆秦命裕親王福全爲撫遠大將軍皇子胤禔副之出古北口恭親王常寧爲安遠大將軍簡親王喇布信郡王鄂扎副之出喜峯口內大臣佟國綱索額明珠彭春等俱參軍事阿密達阿拉尼阿南達俱會軍前己亥以陳廷敬爲工部尙書于成龍爲左都御史癸卯上親征發京師己酉上駐博洛和屯有疾迴鑾八月乙未朔日有食之撫遠大將軍裕親王福全大敗噶爾丹於烏闌布通噶爾丹以喇嘛濟隆來請和福全未卽進師上切責之乙丑上還京丙子噶爾丹以誓書來獻上曰此虜未足信也其整師待之九月癸巳先是烏闌布通之戰內大臣公佟國綱戰歿於陣至是喪還命皇子率大臣迎之凡陣亡官咸賜奠賜卹有差戊申停今年秋決壬子弛民間養馬之禁

冬十月己未上疾少愈召大學士諸臣至乾清宮輪對乙亥以鄂倫岱爲漢軍都統辛巳領翰林院學士張英失察編修楊瑄撰擬修國綱祭文失當削禮部尙書楊瑄褫官戍邊入旗十一月己亥以熊賜履爲禮部尙書甲辰達賴喇嘛請上尊號不許並卻其貢己酉裕親王福全等至京聽勘王大臣議上上薄其罪輕罰之將士仍敘功十二月丁丑上謁陵行孝莊文皇后三年致祭禮庚辰還京是歲免直隸江南浙江甘肅等省三十二州縣衛災賦有差朝鮮入貢

三十年辛未春正月戊申封阿祿科爾沁貝勒楚依爲郡王以與厄魯特力戰受傷被執不屈而脫歸也其十二旗陣亡台吉俱贈一等台吉賜號達爾漢子孫承襲噶爾丹復掠喀爾喀命瓦岱爲定北將軍駐張家口耶談爲安北將軍駐大同川陝總督會西安將軍駐兵甯夏備之命在籍勇略將軍趙良棟參軍事乙卯以馬齊爲兵部尙書二月丁巳朔日有食之乙丑上御經筵命步軍統領領巡捕三營兼轄五城督捕戊午厄魯特策旺阿拉布坦使來噶爾丹之姪也厚賚其使比旋遣郎中桑額護其行三月戊子繙譯通鑑綱目成上製序文

己酉賜戴有祺等一百四十八人進士及第出身有差夏四月戊午左都御史徐乾學致私書於山東巡撫錢鈺事發並褫職丁卯上以喀爾喀內附躬蒞邊外撫綏是日啟鑾五月丙戌上駐多羅諾爾喀爾喀來朝先是喀爾喀土謝圖汗聽哲卜尊丹巴唆殺其同族扎薩圖汗得克得黑墨爾根阿海內亂迭興爲厄魯特所乘至是遣大臣按其事土謝圖汗哲卜尊丹巴具疏請罪上赦之以扎薩圖汗七旗之長飭其弟策旺扎布襲汗號封爲親王丁亥上御行幄土謝圖汗哲卜尊丹巴入覲俯伏請罪大臣宣赦泣涕謝恩賜茶賜宴賜坐大合樂九叩首而退戊子復召土謝圖汗哲卜尊丹巴策旺扎布車臣汗及喀爾喀諸部濟農偉徵諾顏阿玉錫諸大台吉三十五人賜宴諭曰朕欲熟識爾等故復饗宴賜之冠服策旺扎布年幼以皇子衣帽數珠賜之以車臣汗之叔扎薩克濟農納穆扎爾前勸車臣汗領十萬衆歸順身爲之倡請照四十九旗一例殊爲可嘉許照舊扎薩克去其濟農之號封爲郡王餘各封爵有差傳諭喀爾喀曰爾等困窮至極互相偷奪朕已拯救愛養今與四十九旗一體編設各處扎

薩克管轄稽察其各遵守如再妄行則國法治之矣己丑上御甲冑乘馬徧閱各部下馬親射十矢九中次大閱滿洲兵漢軍兵古北口兵列陣鳴角烏鎗齊發聲動山谷衆喀爾喀環囑駭歎曰眞神威也科爾沁喀爾喀各蒙古王貝勒請上尊號不許庚寅上按閱喀爾喀營寨賞牛羊及其窮困者辛卯遣官編輯喀爾喀佐領予之遊牧烏珠穆秦台吉車吉車根等以降附厄魯特按實罪之壬辰上迴鑾癸卯還京辛亥分會試中卷南左南右北左北右中左中右從御史江繁之言也壬子羣臣請上尊號不許六月乙卯以李天馥爲吏部尙書陳廷敬爲刑部尙書高爾位爲工部尙書秋七月甲申西安將軍尼雅翰奉詔督兵遼巴圖爾額爾克濟農於察哈爾濟農憚行遁去尼雅翰追之不及按問論死總督葛思泰追討之朝鮮使人以買一統志發其國論罪致仕大學士杜立德卒予祭葬諡文端閏七月丙辰葛思泰疏報濟農之弟博濟在昌甯湖經總兵柯彩派兵勦敗生擒博濟及前禁之格隆等均斬之乙亥上巡幸邊外九月辛酉上迴鑾道遵化謁孝莊山陵謁孝陵乙丑還京庚午以公阿靈阿爲蒙

古都統甲戌命侍郎博濟李光地徐廷璽偕靳輔視河冬十月庚寅謝爾素番盜殺參將朱震西甯總兵官李芳述擒盜首華木爾加誅之癸巳以巴德渾爲滿洲都統杭奕祿爲荊州將軍丁未甘肅提督孫思克討阿奇羅卜藏斬之先是使於厄魯特之侍讀學士達虎還及嘉峪關爲阿奇羅卜藏所害命思克討之至是捷聞十一月丁巳以索諾和李振裕爲工部尙書以伊勒慎爲滿洲都統己未詔曰朕崇尚德教蠲滌煩苛大小諸臣咸被恩禮卽因事罷退仍令曲全鄉里近來交爭私怨糾結不已頗有黨同伐異之習豈欲釀明季門戶之禍耶其各蠲私忿共矢公忠有怙終者朕必窮治之是時徐元文徐乾學王鴻緒旣罷而傅臘塔等挾搆瑣隱鉤連興獄故特詔儆飭焉甲戌詔曰欽天監奏來歲正月朔日食天象示儆朕甚懼焉其罷元日筵宴諸禮諸臣宜精白供職助朕修省十二月甲申詔曰朕撫馭區宇惟以愛養蒼生俾臻安阜爲念比歲地丁額賦迭經蠲免而歲運漕米尙在輸將時切軫念除河南已經蠲免外其湖廣江蘇浙江安徽山東漕米以次各免一年用紓民力丁亥移旗莊壯丁赴古

北口外達爾河墾田遣侍郎阿山德珠等往陝西監賑壬辰諭督撫提鎮保舉武職堪任用及曾立功者在內八旗旗員令都統等舉之是歲免直隸江南江西河南山東陝西湖廣雲南等省一百八十八州縣災賦有差朝鮮安南琉球入貢

三十一年壬申春正月辛亥朔日有食之免朝賀甲寅上御乾清門出示太極圖五音八聲八風圖因言律呂新書徑一圍三之法用之不合徑一尺圍當三尺一寸四分一釐積至百丈所差至十四丈外矣嘗可用邪惟隔八相生之說試之悉合又論河道閘口流水晝夜多寡可以數計又出示測日晷表畫示正午日影至處驗之不差諸臣皆服庚午上幸南苑行圍二月辛巳以靳輔爲河道總督乙酉以陝西旱災發山西帑銀襄陽米石賑之丁亥上巡幸畿甸辛卯陝西巡撫薩弼以賑災不實褫職戊戌上還京己亥上御經筵乙巳以馬齊爲戶部尙書三月丙辰遣內大臣阿爾迪理藩院尙書班迪赴邊外設立蒙古驛站乙丑命府丞徐廷璽協理河工加甘肅提督孫思克太子少保予世職致仕

大總士馮溥卒予祭葬諡文敏以阿席坦爲滿洲都統置雲南永北鎮夏四月  
庚辰朔以希福爲滿洲都統護巴爲蒙古都統己丑發帑銀百萬賑陝西尙書  
王鵬沙穆哈往視加賑戊戌上幸瀛臺召近臣觀稻田及種竹河道總督靳輔  
請建新莊仲家淺各一闢下部議行五月庚寅諭戶部山西平陽豐收可遣官  
購買備荒命王維珍董其事癸卯定喀爾喀部爲三路土謝圖爲北路車臣爲  
東路扎薩克圖爲西路屬部各從其分地畫爲左右翼六月庚辰以宋犖爲江  
蘇巡撫乙未蒙古科爾沁進獻錫伯卦爾察打虎爾一萬餘戶給銀酬之秋七  
月乙亥上巡幸塞外八月己丑以翁叔元爲刑部尙書以博濟爲西安將軍李  
林隆爲固原提督李芳述爲貴州提督九月戊申噶爾丹屬人執我使臣馬迪  
戕之庚戌上還次湯泉己未還京丁卯上御經筵壬申上大閱於玉泉山冬十  
月己卯詔曰秦省比歲凶荒加以疾疫多方賑濟未甦積困所有明年地丁稅  
糧悉予蠲免從前逋欠一概豁免用稱朕子惠元元至意庚辰以李天馥爲大  
學士壬午上謁陵曲赦陝西非十惡及軍前獲譴者皆免死減一等以佛倫爲

川陝總督宗室董額爲滿洲都統庚寅上還京癸巳以熊賜履爲吏部尙書張英爲禮部尙書庚子停直省進鮮茶暨貢送表箋十一月庚戌以阿靈阿爲滿洲都統甲寅命熊賜履勘察淮揚濱河涸田丙寅加孫思克振武將軍以覺羅席特庫爲蒙古都統十二月壬午河道總督靳輔卒予祭葬諡文襄以于成龍爲河道總督董訥爲左都御史壬辰以郎化麟爲漢軍都統辛丑以西安饑運襄陽米平糶加希福建威將軍移戍右衛召科爾沁蒙古王沙津入京而授機宜使誘噶爾丹是歲免陝西江南四川等省十三州縣災賦有差朝鮮入貢三十二年癸酉春正月甲子詔朝鮮歲貢黃金木棉永行停止二月乙亥朔發帑金招商販米西安平市價丙子遣內大臣坡爾盆等往督歸化城三路屯田詔修南河周橋隄上往年靳輔與陳潢所經度者至是閱河大臣繪圖進呈特詔修之策旺阿拉布坦遣使入貢報告使臣馬喇被害及噶爾丹密事以綵緞資之癸未上御經筵改宣府六廳十衛爲一府八縣戊子命郎談爲昭武將軍偕阿南達領帥師赴甯夏將軍博濟孫思克參軍事庚寅上巡幸畿甸閱霸



州苑家口隄工諭巡撫郭世隆修之庚子上還京貴州巡撫衛既齊疏報勦辦土司失實奪職戍黑龍江三月丙午遣皇子胤禔祭華山丁未移饒州府駐景德鎮乙卯置廣東運司潮州運同庚午詔趙良棟係舊臣可暫領甯夏總兵夏四月丙戌喀爾喀台吉車凌扎布自鄂羅斯來歸賚之袍服賜克魯倫游牧癸巳命檢直省解送物料共九十九項減去四十項免解丁酉以心裕爲蒙古都統五月庚戌命內大臣伯費揚古爲安北將軍駐歸化城六月乙亥廣八旗鄉會中額八月甲戌免廣西四川貴州雲南四省明年地丁稅糧癸未上巡幸塞外行圍蒙古科爾沁諸部朝行在賜冠服銀幣九月丁未修盛京城內寅琉球來貢遣其質子還國丁卯上還京冬十月壬申詔曰給事中彭鵬奏劾順天考官請朕親訊是大臣皆不可信矣治天下當崇大體若朕事事躬親則庶務何由畢理乎壬辰上大閱於玉泉山丁酉鄂羅斯察漢汗來貢上諭大學士曰外藩朝貢固屬盛事傳至後世未必不因而生事惟中國安寧則外患不生當培養元氣爲根本耳十一月辛丑上奉皇太后謁孝莊山陵孝陵庚申還宮甲子

詔免順天河間保定永平四府明年稅糧十二月辛未以宗室公楊岱爲蒙古都統丁亥上幸南苑行圍諭滿州官兵近來不及從前之精銳故比年親加校閱間以行圍頃見諸士卒行列整齊進退嫻熟該軍校等賞給一箇月錢糧該管官賞給緞疋以激戎行丁酉禋祭太廟是歲免直隸江南江西浙江山西湖廣等省六十九州縣災賦有差朝鮮琉球入貢

三十三年甲戌春正月乙卯盛京歉收命馬齊馳往以倉穀支給兵丁海運山東倉穀濟民食丙辰召見河道總督于成龍問曰爾前言減水壩不宜開靳輔糜費錢糧今竟何如成龍曰臣前誠妄言今所辦皆照靳輔而行上曰然則爾所言之非靳輔所行之是何以不明白陳奏尙留待排陷耶因諭大學士曰于成龍前奏靳輔未竹種柳河隄朕南巡時指河干之柳問之無辭以對又奏靳輔放水淹民田朕復至其地觀之斷不至淹害麥田而王鶚董訥等亦附和于成龍言之下部議將于成龍革職枷責上曰伊經手之工未完應革職留任王鶚休致董訥革職二月辛未上御經筵癸酉大學士請問三四日一御門聽政

上曰昨諭六十以上大臣間日奏事乃優禮老臣耳若朕躬豈敢暇逸其每日聽政如常丁丑以諾穆圖爲漢軍都統庚辰上巡幸畿甸勅修通州至西沽兩岸隄工三月辛丑上還京禮部尙書沙穆哈以議皇太子祀奉先殿儀注不敬免官辛酉賜胡任輿等一百六十八人進士及第出身有差以范承勳爲左都御史夏四月庚午理藩院奏編審外藩蒙古四十九旗人丁二十二萬六千七百有奇辛巳以查木揚爲杭州將軍五月戊寅步軍統領凱音布奏天壇新修之路勿令行人來往上曰修路以爲民也若不許行修之何益後若毀壞令步兵隨時葺治順天學政李光地丁母憂令在京守制甲辰命翰林院詹事府國子監日輪四員入直南書房辛亥以紀爾他布爲滿洲都統噶爾瑪爲蒙古都統甲寅詔修類函丁巳上巡幸畿甸閱視河隄諭扈從衛士魚貫而行勿踐田禾戊午上閱龍潭口己未閱化家口黃須口八百戶口王家甫口筐兒港口白駒場口薄弱之處咸令增修庚申閱桃花口永安口李家口信艾口柳灘口等處新隄上曰觀新隄甚屬堅固百姓可免數年水患矣壬戌上還京閏五月庚

午上試翰林出身官於豐澤園六月辛丑加湖廣提督徐治都鎮平將軍丙辰以范承勳爲江南江西總督秋七月丁卯以蔣宏道爲左都御史轉王士禎戶部左侍郎王揆戶部右侍郎巴圖爾額爾克濟農奏報降人祁齊克逃遁遣兵追斬之丁亥上求文學之臣大學士舉徐乾學王鴻緒高士奇及韓炎唐孫華以對上曰韓炎非謫降之人當以原官召補徐乾學王鴻緒高士奇可起用修書並召徐秉義來他日試唐孫華詩佳授禮部主事翰林院行走己丑江南江西總督傅拉塔卒贈太子太保予祭葬諡清端庚寅上巡幸塞外八月己未上駐蹕拜巴哈昂阿喀爾喀哲布尊丹巴來朝賜之冠服九月己巳廣八旗入學額己卯上還京壬午以石文炳爲漢軍都統以王繼文爲雲南貴州總督冬十月丙申以吳赫爲四川陝西總督乙巳以金世榮爲福州將軍十一月丁卯溫僖貴妃鈕祜祿氏薨癸酉以張旺爲江南提督戊寅起陳廷敬爲戶部尙書十二月庚戌以覺羅席特庫爲滿洲都統杜思噶爾爲蒙古都統是歲免直隸山東等省十二州縣災賦有差朝鮮入貢

三十四年乙亥春正月丁亥以護巴爲滿洲都統二月己亥以郭世隆爲浙江福建總督丁巳太和殿工成休致大學士李之芳卒予祭葬諡文襄三月丙戌以石文英爲漢軍都統夏四月丁酉平陽府地震甲辰遣使冊立班禪胡土克圖己酉追敘趙良棟平蜀滇功授一等子世職其部將陞賞有差己未以李輝祖爲河南巡撫五月壬寅朔遣尙書馬齊察賑地震災民巡撫噶世圖以玩災免辛未命在京八旗分地各造屋二千間住兵壬申上巡幸畿甸閱新隄及海口運道建海神廟戊子還京六月丁酉策封皇太子胤礽妃石氏庚子以久雨詔廷臣陳得失禮部祈晴庚申漕運總督王樑奏參衛千總楊奉漕船裝帶貨物諭曰商人裝帶貨物於運何妨王樑乃將貨物搜出棄置兩岸所行甚暴即解任秋七月己丑以覺羅舒恕爲寧夏將軍鄂羅順爲江寧將軍趙良棟告赴江南就醫命給與南巡舊船八月壬辰上巡幸塞外辛丑博濟奏報噶爾丹屬下回子五百人闌入三岔河汎界肅州總兵官潘育龍盡俘之拘於肅州丙午次克勒和洛命宗室公蘇努都統阿席坦護巴領兵備噶爾丹己酉次克勒烏

理雅蘇台調董安國爲河道總督桑額爲漕運總督九月辛巳上還京癸未詔順天保定河間永平四府水潦傷稼免明年地丁錢糧仍運米四萬石前往平糶冬十月丁未命內大臣索額圖明珠視察噶爾丹十一月己未朔日有食之壬戌命大軍分三路備噶爾丹襲八十日糧其駝馬米糧令侍郎陳汝器前左都御史于成龍分督之內寅停今年秋決庚午命李天馥復爲大學士庚辰上大閱於南苑戊子命安北將軍伯費揚古爲撫遠大將軍遣大臣如蒙古徵師示師期十二月己亥命將軍博濟孫思克師出鎮彝乙巳平陽地震命蠲本年糧額並免山西陝西江南浙江西湖廣廣東福建等省通賦赦殊死以下其政令有不便於民者令督撫以聞以齊世爲滿洲都統是歲免直隸山西江西福建廣東等省十二州縣災賦有差朝鮮琉球入貢

三十五年丙子春正月甲午下詔親征噶爾丹資隨征大臣軍校宴甲申命公彭春參贊西路軍務二月丁亥朔上謁陵辛卯上還京壬辰以碩鼎爲蒙古都統癸丑告祭郊廟社稷甲寅命皇太子胤祔留守丙辰上親統六師啟行三月

戊辰上出行宮觀射辛未次滾諾大雨雪上露立俟軍士結營畢乃入行帳軍中畢炊乃進膳以行帳糧薪留待後至者庚辰予故巡撫王維珍祭葬諡敏愍夏四月辛卯上次格德爾庫壬辰上駐塔爾奇拉諭茲已抵邊界自明日始均列環營前哨報噶爾丹在克魯倫命蒙古兵先進據河五月丙辰朔上駐蹕拖陵布拉克辛酉次枯庫車爾壬戌偵知噶爾丹所在上率前鋒先發諸軍張兩翼而進至燕圖庫列圖駐營其地素乏水至是山泉湧出上親臨視癸亥次克魯倫河上顧大臣曰噶爾丹不知據河拒戰是無能爲矣前哨中書阿必達探報噶爾丹不信六師猝至登孟納爾山望見黃幄網城大兵雲屯漫無涯際大驚曰何來之易耶棄其廬帳宵遁驗其馬矢似遁二日矣上率輕騎追之沿途什物駝馬婦孺委棄甚衆上顧謂科爾沁王沙津曰虜何倉皇至是沙津曰爲逃生耳喀爾喀王納木扎爾曰臣等當日逃難即是如此上上書皇太后備陳軍況並約期回京追至拖納阿林而還令內大臣馬思喀追之戊辰上班師是日晨五色雲見癸酉次中拖陵撫遠大將軍伯費揚古大敗噶爾丹於昭莫多

斬級三千陣斬其妻阿奴噶爾丹以數騎遁癸未次察罕諾爾召見蒙古諸王  
獎以修道鑿井監牧之勞各賜其人白金六月癸巳上還京是役也中路上自  
將走噶爾丹西路費揚古大敗噶爾丹唯東路薩布素以道遠後期無功甲午  
諭喀爾喀郡王善巴盡以馬匹借軍功晉封親王貝子益楚克偵敵有勞封爲  
郡王諸臣行慶賀禮乙未賜察哈爾護軍月餼加一金喀爾喀人六金限給三  
年詔停本年秋審壬子以吳璵爲左都御史調張旺爲福建水師提督張雲翼  
爲江南提督秋七月戊午以平定朔漢勒石大學以李輝祖爲湖廣總督癸亥  
廣直省鄉試解額戊辰改吳英福建陸路提督岳昇龍爲四川提督八月丁酉  
索諾和以乏軍興免以凱音布爲兵部尙書九月甲寅朔回回國王阿卜都里  
什克奏臣仗天威得以出降遣臣回國葉爾欽請敕策旺阿拉布坦勿加虐害  
乙卯賜厄魯特降人官秩衣糧壬申上巡幸塞外丙子次沙城詔年來宣化所  
屬牧養軍馬供億甚繁深勞民力其悉蠲明年額賦丁丑副都統祖良璧敗噶  
爾丹部人丹濟拉於翁金冬十月甲申朔遣官齎賜西路軍士衣裘牛羊丁亥



次昭哈賜右衛大同陣亡軍士白金庚寅大將軍費揚古獻俘至賜銀贖出令其完衆戊申上臨視右衛軍士賜食傳諭曰昭莫多之役爾等乏糧步行而能禦敵故特賜食悉免所借庫銀其傷病之人另頒賜之衆叩首歡謝庚戌上駐蹕麗蘇上皇太后書謝賜裘服十一月戊寅噶爾丹遣使乞降其使格墨沽英至蓋徵探上旨也上告之曰俟爾七十日過此即進兵矣庚辰迴鑾十二月壬寅上還京以宗室費揚固爲右衛將軍祁布爲滿洲都統雷繼尊爲漢軍都統庚戌詔陝甘沿邊州縣衛所當師行孔道供億繁多閭閻勞苦其明年地丁銀米悉行蠲免是歲免江南江西等省三十二州縣災賦有差朝鮮入貢

三十六年丁丑春正月丙辰上幸南苑行圍戊辰哈密回部擒噶爾丹之子塞卜騰巴爾珠爾來獻己巳遣官存問勇略將軍趙良棟賜人獲鹿尾甲戌諭朕觀明史一代並無女后預政以臣陵君之事我朝事例因之者多朕不似前人輒譏亡國也現修明史其以此諭增入敕書二月丁亥上親征噶爾丹啓鑾是日次昌平阿必達奏哈密擒獲厄魯特人士克齊哈什哈係害使臣馬迪之首

犯命誅之子女付馬迪之家爲奴戊戌上駐大同丁未次李家溝戊申詔免師行所過崑崙保德河曲等州縣今年額賦是日次輦鄆村山泉下湧人馬霑足庚戌遣官祭黃河之神三月丙辰上駐蹕屈野河厄魯特人多爾濟達拉代等先後來降賜哈密回王金幣冠服丁巳趙良棟卒上聞之嗟悼良久語近臣曰趙良棟偉男子也辛酉次榆林戊辰次安邊城甯夏總兵王化行請上獵於花馬池上曰何如休養馬力以獵噶爾丹乎辛未次花馬池丙子上自橫城渡河遣皇長子胤禔賜奠趙良棟及前提督陳福丁丑上駐蹕甯夏察卹昭莫多翁金陣亡弁兵己卯祭賀蘭山庚辰上閱兵命侍衛以御用食物均賜戰士閏三月辛巳朔日有食之庚寅康親王傑書薨甯夏百姓聞上將行懇留數日上曰邊地磽瘠多留一日即多一日之擾爾等誠意已知之矣夏四月辛亥上次狼居胥山甲寅迴鑾庚申命直省選文行兼優之士爲拔貢生送國子監甲子費揚古疏報閏三月十三日噶爾丹仰藥死其女鍾齊海率三百戶來降上率百官行拜天禮敕諸路班師是日大雨厄魯特降人請慶賀止之先是上將探視

甯夏黃河由橫城乘舟行至湖灘河朔登陸步行率侍衛行獵打魚射水鴨爲糧至包頭鎮會車騎五月乙未上還京丁酉以傅拉塔爲刑部尙書席爾達左都御史翁叔元能以吳璵爲刑部尙書張鵬翮左都御史癸卯禮部請上尊號不許六月甲寅禮部請於師行所過名山磨崖紀功從之予故勇略將軍一等子趙良棟祭葬諡襄忠秋七月癸未羣臣請上皇太后徽號三上不允乙未以朔漠平定遣官祭告郊廟陵寢先師賜李蟠等一百五十人進士及第出身有差晉封大將軍伯費揚古一等公參贊以下各授世職辛丑免旗兵借帑乙巳遣官賚外藩四十九旗兵丁未上巡幸塞外八月乙亥上駐巴圖舍里賜蒙古王公台吉銀幣九月癸未厄魯特丹濟拉來歸上獨御氈幄召見之丹濟拉出語人曰我罪人也上乃不疑眞神人也甲午上還京庚子以都統凱音布兼步軍統領壬寅上御經筵乙巳振平將軍湖廣提督徐治都卒贈太子少保子祭葬諡襄毅賑黑龍江被水居民以席爾達爲兵部尙書哈雅爾爲左都御史冬十月己巳始令宗室應鄉會試壬戌詔曰比年師行出入皆經山西地方有行

齋居送之勞其免山西明年額賦叙從征鎮國公蘇努功晉封貝子庚午上謁陵甲戌內監劉進朝以訛詐人論死十一月辛巳上還京丙戌和碩恪靖公主下嫁喀爾喀郡王敦多布多爾濟戊戌朝鮮告糴命運米三萬石往賑甲辰詔直省報災卽察實以聞十二月丁卯改宗室董額爲滿洲都統乙亥祫祭太廟是歲免直隸江南安徽江西等省五十九州縣災賦有差朝鮮琉球安南入貢三十七年戊寅春正月庚寅策旺阿拉布坦奏陳第巴匿達賴喇嘛圓寂之事斥班禪而自尊懇請睿鑒上答之曰朕曾敕責第巴具奏認罪若怙終不悛朕不輕恕也并遣侍讀學士伊道等齋敕往癸卯上巡幸五臺山甲辰次涿州命皇長子胤禔大學士伊桑阿祭金太祖世宗陵二月辛亥詔免山西三十六年逋賦癸丑上駐蹕菩薩頂乙丑遣官賑山東戊辰上還京三月丙子朔上御經筵丁丑封皇長子胤禔爲直郡王皇三子胤祉爲誠郡王皇四子胤禩皇五子胤祺皇七子胤祐皇八子胤禩俱爲貝勒戊子禁造燒酒辛卯直隸巡撫于成龍奏借西洋人安多等履勘渾河幫修挑濬繪圖呈進得旨於六月內完工夏

四月癸亥減廣東海關稅額己巳詔溫郡王延壽行止不端降爲貝勒貝子袁端創爵壬申以貝子蘇努管盛京將軍癸酉上閱漕河五月甲戌武清民請築外隄上曰築外隄恐損民田民曰河決之害更甚於損田上曰水潦將降暫立木椿護隄開小河洩水俟明春雨水前爲爾等成之癸未上還京壬寅裁上林苑以李林盛爲陝西提督張旺爲廣西提督是月策旺阿拉布坦上言與哈薩克構兵及將丹津鄂木布拘禁各緣由命示議政大臣六月辛亥移吳英爲福建水師提督丁巳改四川梁萬營爲化林營設參將以下官己未雲南巡撫石文晟奏三藩屬人奉旨免緝者准其墾田應試從之秋七月癸酉朔張玉書丁母憂以吳璵爲大學士王士禛爲左都御史辛卯命吏部月選同通州縣官引見癸巳霸州新河成賜名永定河建河神廟己亥以盧崇耀爲廣州將軍殷化行爲廣東提督庚子以蘇爾發爲滿洲都統辛丑上奉皇太后東巡取道塞外八月癸丑上奉皇太后臨幸喀拉沁端靜公主第賜金幣及其額駙噶爾臧甲子皇太后望祭父母於發庫山己巳賜端敏公主及其額駙達爾漢親王班第

金幣湖南山賊黃明犯靖州陳丹書犯茶陵州官兵討平之九月壬申上次克爾蘇臨科爾沁故親王滿珠習禮墓前酌酒孝莊皇后之父也癸巳上駐扎星阿賜黑龍江將軍薩布素等金幣冠服庚子停盛京烏拉本年決囚冬十月癸卯上行圍射殪二虎其一虎隔澗射之穿其脇丁未上行圍槍殪二熊是日駐蹕輝發己酉裁雲南永甯府置永北府癸巳上駐蹕興京甲寅上謁永陵遣官賜奠武功郡王禮敦墓改貴州水西土司置大定平遠黔西三流官丁巳上謁福陵昭陵臨奠武勳王揚古利直義公費英東宏毅公額亦都墓免奉天今年米豆壬戌上奉皇太后迴鑾十一月癸未上奉皇太后還宮丙戌詔曰朕巡幸所經敖漢奈曼阿祿科爾沁扎魯特諸蒙部水草甚佳而生計窘迫蓋因牲畜被盜不敢夜牧耳朕即遣郎中李學聖等往爲料理盜竊衰止其他處蒙古亦宜照此差遣旗員有願往蒙古教導者准其前往命盜各案同聽決之庚寅以張鵬翮爲江南江西總督十二月辛丑朔命徐廷璽協理河務命尙書馬齊侍郎喻成龍常綬察視河工庚戌諭宗人府閒散宗室材力幹濟精於騎射及貧

無生計者各察實以聞詔官民妻女緣事牽連勿拘訊著爲令改四川東川土司爲東川府設知府以下官戊午詔八旗察訪孝子節婦己未以巴錫爲雲南貴州總督馬自德爲京口將軍己巳祫祭太廟是歲免直隸江南福建浙江湖廣等省三十五州縣災賦有差朝鮮入貢

三十八年己卯春正月辛卯詔朕將南巡察閱河工一切供億由京備辦預飭官吏勿累閭閻二月壬寅詹事尹泰以不職解任癸卯上奉皇太后南巡啟鑾戊申以天津總兵潘育龍訓練有方賜御服貂裘三月庚午上次清口奉皇太后渡河辛未上御小舟臨閱高家堰歸仁隄爛泥淺等工截漕糧十萬石發高郵寶應等十二州縣平糶壬申上閱黃河隄丙子車駕駐揚州諭隨從兵士勿踐麥禾壬午詔免山東河南通賦曲赦死罪以下癸未車駕次蘇州辛卯車駕駐杭州丙申上閱兵較射戊戌上奉皇太后迴鑾夏四月庚子朔迴次蘇州詔免鹽課關稅加增銀兩特廣江浙二省學額乙巳以丹岱爲杭州將軍己酉車駕次江甯上閱兵庚申次揚州辛酉以彭鵬爲廣西巡撫丙寅渡黃河上乘小

舟閱新掃五月辛未次仲家聞書聖門之哲額懸先賢子路祠乙酉上奉皇太后還宮丁亥以馬爾漢爲左都御史王鴻緒爲工部尙書六月戊戌朔起郭琇爲湖廣總督以鎮國公英奇爲蒙古都統秋七月甲申河決淮揚閏七月戊戌敏妃張佳氏薨誠郡王胤祉其所出也不及百日薨髮降貝勒癸丑先是苗賊黃明屢報獲報死仍報犯事至是遣官按勘并其夥陳丹書吳思先等三十餘人誅之其奏報不實之督撫麻勒吉等降黜有差上巡幸塞外九月丙午上還京丙辰上御經筵改揚岱爲滿洲都統魯伯赫拖倫崇古禮俱爲蒙古都統戊午大學士阿蘭泰卒上悼惜之遣皇長子胤禔視疾賜奠加祭諡文清冬十月癸酉上巡視永定河工庚辰上還宮大學士李天馥卒予祭葬諡文定十一月乙巳上謁陵壬辰以馬齊佛倫熊賜履張英爲大學士陳廷敬爲吏部尙書李振裕爲戶部尙書杜臻爲禮部尙書馬爾漢范承勳爲兵部尙書王士禛爲刑部尙書壬寅命滿漢給事中各四員侍班丙午令寶源局收買廢錢十二月戊辰上還京癸巳祫祭太廟是歲免直隸江南江西浙江福建陝西湖廣等省七



十三州縣災賦有差朝鮮琉球入貢

三十九年庚辰春正月己未朝鮮國王李焯以遣回難民進方物上還之癸亥上閱永定河工二月甲戌上乘舟閱郎城柳岔諸水道水淺易艇而前指示修河方略壬午還京己丑命內大臣費揚古伊桑阿考試宗室子弟騎射三月甲午上御經筵吏部奏安徽巡撫李鈞被參一案請交將軍提督查按上曰將軍提督不與民事部議不合嚴飭之尙書庫勒納旋罷癸卯改張鵬翮爲河道總督鵬翮請撤協理官及效力員部臣寬文法以責成功從之甲寅以宗室特克新爲蒙古都統丙辰賜汪繹等三百一人進士及第出身有差四川巡撫于養志提督岳昇龍互訐遣官按鞠俱削職夏四月庚辰上閱永定河命八旗兵丁協助開河以直郡王胤禔領之僖郡王岳希等五人偕往壬午上閱子牙河壬辰還京五月丁未以阿山爲江南江西總督甲寅以阿靈阿爲蒙古都統六月癸亥張鵬翮報修浚海口工成河流暢遂改攔黃壩爲大通口建海神廟杜臻罷以王澤弘爲禮部尙書李柟爲左都御史丁亥停宗室科舉秋七月甲午理

藩院議覆喇嘛商南多爾濟所奏策旺阿拉布坦遣兵往青海一事毋庸議上  
曰此事目前甚小將來關係甚大該部擬以勿庸議倘青海間商南多爾濟何  
以答之策旺阿拉布坦爲人狡猾素行奸惡鄰近諸部俱與仇讎其稱往征第  
巴道遠險多或慮張聲勢以恫嚇青海未可知也要使不敢構衅爲是乙巳定  
翰林官編檢庶吉士月給銀三兩例學道缺出較俸派出壬子故振武將軍孫  
思克卒命皇長子胤禔奠酒賜鞍馬二匹銀一千兩諡襄武丁巳上巡幸塞外  
命李光地張鵬翮郭琇彭鵬詳議科場事宜八月辛未上次齊老圖九月癸巳  
停今年秋決詔張鵬翮專理河工范成勳等九人撤回給事中穆和倫請禁服  
用奢侈閣臣票擬申飭上曰言官耳目之職若因言而罪之誰復言者惟其言  
奢侈在康熙十年後則非乃在輔臣時耳今少息矣冬十月辛酉皇太后六旬  
萬壽節上製萬壽無疆賦親書圍屏進獻癸酉上巡閱永定河戊寅上還京己  
卯命本年行取科道未補官者作爲額外御史隨班議事十一月庚寅命青海  
鄂爾布圖哈灘巴圖爾移駐甯夏詔侍郎溫達查視陝甘驛站王澤宏免以韓

英爲禮部尙書命大臣及清要官子弟應試者編爲官號限額取中辛亥上巡幸邊外命卓異官如行取例引見戊午四川打箭爐土蠻作亂遣侍郎滿不偕提督唐希順討之十二月己未朔上駐蹕煖泉賜外藩王以下至官兵白金戊辰上還京癸酉移蕭永藻爲廣西巡撫彭鵬爲廣東巡撫壬午故安親王岳樂坐前審擬貝勒諾尼一案失入追降郡王子僖郡王岳希貝子吳爾占俱降鎮國公丁亥祫祭太廟是歲免直隸江南安徽陝西浙江等省五十七州縣災賦有差朝鮮入貢

四十年辛巳春正月辛亥以河伯效靈封金龍四大王甲寅以心裕爲滿洲都統二月己未朔上巡閱永定河諭李光地曰河水涸必致淤塞此甚難治當徐議之乙丑滿不唐希順討打箭爐土蠻平之蠻民萬二千戶內附庚辰上還宮三月戊子御經筵丁酉張鵬翮請以治河方略纂集成書上斥之曰朕於河務之書罔不披閱大約坐言則易實行則難河性無定豈可執一法以繩之編輯成書非但後人難以倣行即授之己心亦難自信張鵬翮試編輯之給事中

馬士芳劾湖北布政使任風厚年老調來引見年尙未衰上因諭曰坐而辦事  
必得老成練達者方能得當州縣官則不可耳夏四月己未調李林盛爲甘肅  
提督擢潘育龍爲固原提督移藍理爲天津總兵官以曹秉桓爲漢軍都統丙  
子刑部尙書王士禎請假回籍上諭大學士曰山東人性多偏執好勝尋仇惟  
王士禎無之其詩甚佳居家惟讀書若令回籍殊爲可惜給假五月不必開缺  
丁丑上閱永定河諭李光地隆冬冰結可照常開洩清水流於冰下爲冰所逼  
衝刷河底愈深閘大灣口諭石隄尙未興工可以南來杉木排椿爾等勿忽閘  
丁酉河乙酉上還京五月癸巳黑龍江管水手官員缺部臣擬補遣戍道員周  
昌上曰周昌旣遣戍矣又補官烏拉是終身不得歸也可令八旗官願效力者  
爲之戍申御史張瑗請毀前明內監魏忠賢墓從之丙辰上巡幸塞外六月庚  
辰授宋儒邵雍後裔五經博士秋七月丁亥領侍衛內大臣公費揚古隨扈患  
病上爲停鑾一日親往視疾隨以不起聞賜鞍馬三匹散馬四匹銀五千兩遣  
大臣護送還京予祭葬諡襄壯八月乙丑上幸索岳爾濟山詔曰此山形勢崇

隆允稱名勝嗣後此處禁斷行圍甲申上次馬尼圖行圍一矢穿兩黃羊並斷  
拉哈里木蒙古皆驚九月辛丑簡親王雅布隨扈薨命大臣送還京皇長子胤  
禩皇三子胤祉出迎遣官治喪賜銀四千兩皇子合助銀三千兩發引時皇子  
侍衛往送予祭葬立碑諡曰脩乙巳上還京庚戌上御經筵大學士王熙以衰  
疾乞休溫旨慰諭加少傅致仕噶爾丹之女鍾齊海到京命與其兄一等侍衛  
色卜騰巴爾珠爾同居配二等侍衛蒙古沙克都市冬十月戊午以宗室特克  
新爲滿洲都統迂圖佈爾塞爲蒙古都統己未召大學士張玉書還朝詔免甘  
肅來年額賦庚申以梁鼎爲福建陸路提督辛酉免江蘇明年額賦起岳昇龍  
爲四川提督辛未改普奇爲滿洲都統孫渣齊爲蒙古都統以華顯爲四川陝  
西總督癸酉大學士張英乞休溫旨慰諭令致仕御史靳讓疏言爲州縣者須  
令家給人足方爲良吏命改靳讓通州知州詔總督郭琇張鵬翮桑額華顯巡  
撫李光地彭鵬徐潮各舉賢能平悼郡王訥爾福薨子訥爾素襲爵十一月甲  
午詔朕詳閱秋審重案字句多誤廷臣竟未察出一二刑部尤爲不慎其議罰

之十二月壬申廣東連山瑤匪作亂命都統嵩祝討之辛巳貽癸太廟是歲免  
直隸江南河南陝西廣東等省四十二州縣災賦有差朝鮮琉球入貢